



15. 1. 2019 / BROJ 46

GIMNAZIJALCI SA VILSONOVA



DAN DRŽAVNOSTI BiH



DECEMBARSKI DANI KULTURE



KOL'KO SMIJEHA, TOL'KO MUZIKE



PLESNA REVIJA



POSJETA GIMNAZIJE IZ TURSKE



Sadržaj

DAN DRŽAVNOSTI

Svečana akademija povodom Dan državnosti	2
Naši učenici na predavanju	2
Bosna i Hercegovina	3
Bosno moja, ljubavi moja	3
Domovina	4
I nakon svega, Bosna...	4
Ko li sam ja?	4
Ritam naše duše	4
Ferhadjo...	5
Nema zemlje slične Bosni	5

DEŠAVANJA U ŠKOLI

Od danas smo bogatiji za još jednu generaciju učenika!	6
Razmjena udžbenika	6
Društveno korisno učenje u Trećoj gimnaziji	7
Plesna revija Treće gimnazije	9
Projekt STEM	10
Konfučijev institut u Trećoj gimnaziji	11
Gosti na časovima	12
Projekt "Ekologija, energija, budućnost"	13
Posjeta gimnazije "Adnan Menderes" iz Istanbula	14
Decembari dani kulture	16
"Kol'ko smijeha, tol'ko muzike"	18
Posjeta Centru za zdravo starenje Novo Sarajevo	19
Životna priča Irfana Ribića	19
Izložba u Historijskom muzeju	20
Obilježavanje Dana dječijih prava	20
Uspješna realizacija DSD-ispita	21
"Sarajevski Sherlock"	22
Maturanti dobrovoljno darovali krv	22
Ispraćaj u mirovinu naših dragih uposlenika	23
Podjela paketića	23
Godišnjica mature generacije 1994–1998.	24

OBILJEŽAVANJE ZNAČAJNIH DATUMA

Evropski dan jezika	25
Panel povodom Međunarodnog dana srednjoškolaca	25
Socijalni dan 2018	26
Obilježeno 70 godina Deklaracije o ljudskim pravima	26
Dani o Allahovom Poslaniku "Selam, ya resulallah"	26
Desetogodišnjica PASCH-a u Bosni i Hercegovini	27

USPJESI NAŠIH UČENIKA

Tarik Jelačić na Olimpijadi iz geografije	28
Svečanost za izvrsne učenike srednjih škola	28

Sara Ažman, reprezentativka BiH u ritmičkoj gimnastici	29
Edna Šunjić - Zlatna medalja kao posveta djeci Bosne i Hercegovine s Down sindromom	30
Faruk Terzić, viceprvak BiH	31
Kros	31
Osmi Izvor film festival	31
S.ketch 8. Street basketball 2018	32
Školski turnir u malom nogometu	32
Atletski kup srednjih škola Općine Novo Sarajevo	33
Gimnazijada	34

IZLETI I POSJETE

Školski izlet	36
Planinari na Trebeviću	37
Posjeta Srebrenici	38
Studijska posjeta Beogradu	39
Posjeta učenika Danskoj	40
Studijska posjeta maturanata	42

POSJETE

Posjete pozorištima	44
U Art kući sevdaha	46
Posjeta Muzeju "Alija Izetbegović"	46
U Muzeju Jevreja	47
Posjetili smo Aškenašku sinagogu	47
Sarajevo digital marketing	48
Posjeta predavanju CERN-a u Likovnoj akademiji	48
ETOS inicijativa	49
Evropski parlament mladih (European Youth Parliament)	50

I ŠTA POGLEDAŠ SVE JE PJESMA

Dani Matice hrvatske - Posebno priznanje	51
"...sve je to izašlo iz moje šalice čaja" (M. Prust: "Šolja čaja")	51
Dok čekamo bolju budućnost, ne smijemo zaboraviti da je naša i sadašnjost	52
A sve ovo bit će jučer...	53
San	53
Je l' Sarajevo gdje je nekad bilo?	54
Voda vrijedi da se štedi	54
Na ljetovanju	55
Novinarsko-fotografska sekcija	56

Svečana akademija povodom Dan državnosti

Kao i svake godine učenici Treće gimnazije obilježili su Dan državnosti u školskom amfiteatru. Upravo tog historijski vrlo značajnog 25. novembra 1943. godine održano je prvo zasjedanje ZAVNOBiH-a (Zemaljsko antifašističko vijeće narodnog oslobođenja Bosne i Hercegovine) u Mrkonjić-Gradu. Na prvom zasjedanju donesena je odluka o obnovi državnosti BiH, potvrđene su njene historijske granice, koje datiraju još iz vremena srednjovjekovne Bosne. Ovo je poseban 75. rođendan naše domovine, pa su i učenici sa profesorima na drugačiji način obilježili ovaj datum. Tradicionalno smo i ovu manifestaciju otvorili pjesmom "Dragoj mojoj BiH" u izvedbi školskog hora i orkestra sa profesoricom Aidom Kamenicom. Historijska sekcija, koju vodi profesorica Emira Hubjer, priredila je kratki čas historije o Danu državnosti. Ništa od ovoga ne bi bilo potpuno bez Literarne i Recitatorske sekcije, koju vode profesor Džemaludin Poturović i profesorica Elma Mašnić-Šikalo. Učenici Literarne sekcije su još jednom podijelili izvanredni talenat sa svima nama. Recitatorska sekcija je udahнула dušu svakoj pjesmi, a uživali smo i u njihovom performansu. Sve ovo je uljepšao školski bend "Kontrapunkt" sa nekoliko pjesama koje smo jednoglasno pjevali i čestitali našoj domovini Dan državnosti.

Anela Coković, IV,



Naši učenici na predavanju

Sa profesorom Abidom Zukićem učenici II₅ 22. novembra 2018. prisustvovali su predavanju "Istorijski razvoj Bosne i Hercegovine od prvog zasjedanja ZAVNOBiH-a do Dejtonskog mirovnog sporazuma".

Predavanje je održano u Međunarodnom centru za djecu i omladinu Novo Sarajevo, a predavači su bili prof. dr. Tomislav Išek, prof. dr. Husnija Kamberović, general Mustafa Polutak i akademik Mirko Pejanović.



Bosna i Hercegovina

Domovina... Mjesto gdje se osjećaš najsigurnije, dragulj koji čuvaš u srcu i nosiš ga sa sobom gdje god da kreneš, ljubav koja nikada ne prestaje, na čijeg imena spomen srce svaki put zatreperi. Takva je i meni moja Bosna! Prkosna i ponosna od davnina. Mnogi su prošli kroz nju. Neki nam ostaviše kule, građevine, neki pokušahu da je unište. Svi oni su prošli Bosnom, iščezli, a ona je ostala, stoji čvrsto kao i Bjelašnica, Trebević, Zelengora, Maglić, sačuvana ljubavlju svojih sinova i kćeri koji bi za njenu slobodu i život dali. Pa i ovaj datum koji dolazi, 25. novembar, još jedan je dokaz tvoga postojanja i naše ljubavi prema tebi.



Kada govorim o Bosni, ja ne govorim samo o državi u kojoj živim, govorim o njoj ljepoti, njenim planinama, rijekama, gradovima i biseru koji je njen simbol, Sarajevu ili kao što ga Turci zovu, Saray Bosna. Ne znam šta nose novi dani i godine, ali znam da Bosnu u mom srcu nikada i niko neće moći zamijeniti, ali i da će ona vijekovima čvrsto stajati i biti simbol prkosa, ponosa i najljepše i najiskrenije ljubavi koja postoji.

Hena Gojak, III₆

Bosno moja, ljubavi moja

I ove nedjelje padat će kiša. I ove nedjelje nebo će nad Bosnom plakati, po ko zna koji put. Ali ne od tuge, baš suprotno. Plakat će od sreće. Plakat će vidjevši Bosnu ponovo u punom sjaju. Bosna će i ovog 25. novembra biti centar svijeta, za nas. Njen sjaj će obasjati tamnu noć i osvjetliti put čak i neprijateljima. Svoj sjaj ona će prosuti od Une i Save do Neretve i Drine. Pokazat će da je i mrak lijep ako je sjaj dovoljno jak. Šta je mrak negoli nepostojanje svjetla. Bosna je upalila svjetlo u mraku već davno, a to svjetlo niko ne može ugaziti. U nedjelju će u ranu zoru pijetao svojim glasom



buditi narod, a onda će ljudi uživati u nedjeljnom jutru i kahvi. Uživat će u mirisu hadžibega i jorgovana te slušajući žubor naših rijeka. U nedjelju će komšija kršćanin preći u avliju kod komšije muslimana da zapjevaju po jednu uz saz i harmoniku. U nedjelju će u vrijeme akšama ezan krasiti našu domovinu, a nakon toga i zvona na crkvama. Ali zar je to bitno? Zar je bitno koje je ko vjere ili nacije, zar je bitno kojeg je političkog opredjeljenja ili kojoj generaciji pripada. Ama nije bitno! Najbitnije je da svi možemo jasno i glasno reći ko smo. Najbitnije je da smo ljudi. Ljudi koji čuvaju, hvale i čine dobro za Bosnu i Hercegovinu. To i jesu naše dužnosti. Ali voljeti Bosnu svim srcem je tajna uspjeha i opstanka. Nemojte je nikome reći. I ove nedjelje će padati kiša. Kiša ponosa, jer se Bosna digla iz pepela, kao sto puta do sada. Bosno moja, ljubavi moja.

Ajla Gradišić, III₃

Domovina

Postoji generacijama, vijekovima
postoji u meni, u tebi, u svim našim srcima
Od Save do Neretve, od Une do Drine,
od Semberije do Jadrana, tu leži moja domovina
U njoj su dobri ljudi za nju krv lili
pokušali su je srušiti ljudi zli, ali su se podvijenog repa
svojoj zemlji vratili
nisu je mogli slomiti, u okove staviti
Jer njene planine u nebesa idu
rijeka kroz klisure protiču
doline se beskonačno prostiru
pećine u dubinu poniru
Zemlja po kojoj ja hodam je dio mene, a ja dio nje
neka me zbog tog i mrze ako hoće
Ja ću hodati uzdignute glave
jer dok Bosna postoji, ima i nade

Nejra Šaljić, III₆

I nakon svega, Bosna...

Bosno! Nađoh te u stihovima najljepšim,
u srcu soneta i sevdalinke,
pa u dubini srca osjetih toplinu,
hiljadama godina vrele.

Bosno! Primi u zagrljaj one
koji te od barbarina sačuvaše,
i dadni im ljiljane mjesto mačeve
za borbe nove, vrle, časne.

Bosno! Ti bješe ostavljena,
ali ne ostade sama,
jer dok je sinova i kćeri
tvojih bosanskih,,
mostove nove ćemo graditi,
i rijeke zla zajedno preplivavati.

Emina Bajrić, III₆

Ko li sam ja?

Žubori, žuri, čuješ li?
Ta velika rijeka po kojoj dobih ime
Nikad ne staje, kroz žile moje djece protiče
Dosta vidjeh, dosta proživjeh
Po meni su koračali i banovi i kraljevi,
Osmanske paše i sultani
Čula sam smijeh svakog sina i kćerke
Dok je trajao mir pored korita rijeke
Čula sam krik boli oca i majke
Dok su neprijatelji koračali kroz moje šume i oduzimali živote
Doživjeh uspone visoke kao moje planine
Doživjeh padove pune hladnoće i tame
Otkako postojim su me gazili
Na sve načine lomili, nekad čak i do temelja srušili
Ali ja se svaki put podignem, i i dalje stojim
Dušmanima prkosim, svojim narodom se ponosim
I nebitno je da li sam ja velika ili mala
Da li se prostirem između dva potoka ili preko bezbroj kilometara
Dok god me se sjećaju, ja sam živa
Ko li sam ja?
Zapamti moje ime dobro
Ja sam Bosna i Hercegovina

Iman Bostandžić, III₆

Ritam naše duše

Bosno moja, moja Hercegovino, djeca tvoja ponosno ruku
drže kada himna tvoja krene kucati ritmom naše duše
stojimo uspravno, glave podignute, u nebo, u plavo nebo
sa Suncem i zvijezdama od svile, ponosno gledamo kako
se tvoja zastava vijori. Gledamo kako u zraku leprša kao
ptica bijela, čista i nježna. A ispod neba, visoki bedemi,
visoki ljudski bedemi. Sve silni, sinovi Bosne, ne daju
dušmaninu da kroči na naša polja, livade i planine. Jer
Bosno moja, tebe ima i bit će te dok ima nas. Nas koji te
u bešici ljuljamo i ljubimo kao tek rođeno čedo.
Jer, Bosno moja, ti i jesi tek rođena. Vijekovima se rađaš
i uvijek si tek rođena, čista i nevina. Bosno moja, moja
Hercegovino, ne zaboravi da djeca tvoja ponosno ruku
na srcu drže kada himna tvoja krene kucati ritmom
naše duše i zauvijek će kucati.

Lejla Nuhić, III₄

Ferhadijo...

- "U 5 do 8, Ferhadija."
- "5 do 8", ponovim, "čekam te".

Ferhadijo, koliko li si se sastanaka nagledala, koliko li razgovora prisluškičala, na koliko ružnih riječi začepila uši? Pamtiš li ti sve te priče ili samo sve te priče pamte Tebe?

Razmišljam koji to nevidljivi konci mi ušivaju srce u ovo parče zemlje.

Razmišljam kako je nekad, u 5 do 8, djevojka mog imena čekala nekog svog na istom ovom mjestu kao ja.

Dobro, možda ne baš u Ferhadiji, ali u Miskinovoj, naprimjer, ili Ulici prkosa..

Mada, mi smo, u principu, vezane za isto mjesto, iako je, vjerovatno, samo njegov geografski položaj ostao apsolutno nedirnut?

No dobro, moramo i tebe malo da "updateamo".

Mostar grade, što si stariji, to si ljepši,

Ostani u onoj formi što zovu "tradicija",

Ovi na dijete "Samo Strogo Moderno" već odavno počinju malo da sliče?

Dobro veče, Banjaluko, kriješ sat koji pokazuje netačno vrijeme, ali vjerujem da u spomenaru imaš zapisano mnogo dobrih tajminga, upravo ispod sata koji uvijek pokazuje 09:11. S tim da je na njemu vrijeme stalo, a tvoje leti.

Postoje te neke sile koje ne vidiš, ali čije djelovanje osjetiš, itekako. I mislim da se mjerna jedinica zove "ljubav", mada je sve to relativno.

Rođena sam 1.1.2001. na dijelu Zemljine kugle gdje se na sastanku nalaze predstavnice tri monoteističke religije baš na istom onom mjestu kao i ja večeras - Ferhadiji. Na parčetu planete gdje se miris čuje, a po doktorima se hoda, papiri se ganjaju, a na zvonu se leži, kafa se peče, hodamo po jajima, oblacima i iglama, ovisno od nafake, pričamo k'o navijeni, a šutimo k'o zaliveni; i ako ikad poželite plakati od šege, ili smijati se od tuge, ili ako pak poželite saznati šta to znači "merak" ili "čejf", pokucajte u epicentar moga srca, gdje se danas slavi. Slavi se u čast feniksu, koji se uvijek nekako digno iz pepela, i uvijek leti ... Pokucajte, jer ovdje još ima mjesta za svakog.

Dina Kurtalić, III₄

Nema zemlje slične Bosni

Pogledaš na kalendar, zadržavajući pogled, nakratko, na svakom mjesecu u tekućoj godini.

Vidiš, prošao je april, sa platna slikara nestaje zelene boje.

Prošlo je i ono jarko sunce, miris mora i so u kosi.

Na hiljade listova je zaljubljeno sa grana palo.

U zraku osjetiš da se pahulje spremaju za svoj ples, po ustaljenoj putanji.

Putanji, krova svijeta, prema nazeblj zemlji koja, ipak, čeka na te ledene poljupce.

Sve to, živiš i doživljavaš u ovoj maloj zemlji.

Zemlji sa burnom historijom.

Majci, sa hiljadu rana po rukama.

Ali, te rane, bar neke, s vremenom su zacijelile.

Zemlja je ovo sa hiljadama lijepih priča, tisućama ljubavi, nevjerovatnih uspomena, talenata, sa bogatom kulturom, tradicijom i običajima.

Nema zemlje slične Bosni, Bosna nije slična ni jednoj.

Vidiš, na kalendaru, novembar.

I onda ti taj čitav mjesec dobije novo značenje, nije kao ostali, nije običan. I onda čekaš samo dan, onaj 25. Dan kada su ovoj maloj zemlji priznate granice koje i danas čine oblik, najbližnji obliku srca.

Zemlji koja te odgaja, koja te odgojila, u kojoj rasteš, u kojoj si rastao. Zemlji, majci koju treba čuvati. Jer...

Majka je samo jedna, naša je ova - Bosna i Hercegovina.

Elma Slabić, III₃

Od danas smo bogatiji za još jednu generaciju učenika!

U amfiteatru naše škole prvog radnog dana u školskoj 2018/2019. godini upriličena je svečanost povodom početka novog poglavlja u životima učenika prvog razreda.

Na ulazu u školu predsjednica Vijeća učenika Amila Manjić dočekala je prvačiče dijeleći čokoladice i bombone.

Srdačnu dobrodošlicu u Treću gimnaziju poželjela je direktorica škole Senada Salihović zahvalivši učenicima i njihovim roditeljima na izboru naše škole u budućem stjecanju novih znanja. Istakla je da je kolektiv Treće gimnazije ponosan zbog toga što su najbolji učenici u Kantonu Sarajevo odlučili ukazati nam povjerenje poželjevši im sretan početak njihovog četverogodišnjeg srednjoškolskog obrazovanja, mnogo uspjeha u učenju i postizanju što boljih rezultata. Direktorica škole predstavila je: članice Uprave Amru Čolić, pomoćnicu direktorice, Stručne službe škole Hasiju Dedović, pedagogicu, Merimu Pašalić, psihologinju, Amelu Mufić-Arapović, socijalnu radnicu, i Azru Smajović, administrativnu radnicu. Školski bend "Kontrapunkt" pozdravio je učenike izvedbom popularnih pjesama.



Pomoćnica direktorice Amra Čolić također im je poželjela dobrodošlicu te je prozvala učenike po odjeljenjima koji su sa razrednicima otišli u kabinete kako bi se upoznali o Trećoj gimnaziji.



Dragi naši prvačiči!

Želimo da Treća gimnazija bude vaš drugi dom, mjesto radosti i druženja na kojem će vam istinsku podršku u stjecanju novih znanja, radu, kreativnosti, uzajamnom poštovanju pružiti kolektiv Treće gimnazije!

Razmjena udžbenika

Bazar "Razmijeni korišten udžbenik" održan je u dvorištu naše škole 12. septembra 2018. godine. Učenici su u lijepoj atmosferi, uz druženje, razmijenili stare udžbenike za nove i pritom uštedjeli novac.



Društveno korisno učenje u Trećoj gimnaziji

Nova školska godina započela je novim, vrlo zanimljivim izazovima. Društveno korisno učenje uvedeno je u prve razrede gimnazija u Kantonu Sarajevo u cilju obrazovanja društveno odgovornih i aktivnih mladih ljudi. Veoma lijepa i plemenita ideja i prilika da se dodatno utječe na razbijanje predrasuda, prihvatanje drugačijeg, razvoj empatije i učeničkih sposobnosti i vještina.

Nakon kratke edukacije i upoznavanja koordinatora i supervizora o Priručniku društveno korisnog učenja, krenuli smo u organizaciju i realizaciju novih zadataka. Prije svega, detaljno smo upoznali naše učenike o oblicima društveno korisnog učenja i načinima realizacije istog. Odmah smo krenuli u akciju – sakupljali smo lišće i čistili sportsko vanjsko igralište. Potom smo čistili i uređivali zelenu površinu i dvorište ispred škole.

U saradnji sa UG "Srce puno osmijeha" organizirali smo razgovaranje i razmjenu iskustava, te pomogli da se učenici hrabrije upuštaju u samostalne projektne aktivnosti društveno korisnog učenja. Odmah potom slijede aktivnosti za pomoć

učenima osnovne škole u učenju i pisanju zadaće, te podučavanje djece predškolskog uzrasta iz engleskog jezika, matematike i arapskog jezika. Stiže i prijedlog za oslikavanje zidova školske kantine. Pa, potom i prijedlog za pomoć u radu Narodnoj kuhinji, kao i podršku pri prikupljanju grickalica i slastica za djecu u socijalno ugroženim porodicama, a u organizaciji dobrotvornog društva "Merhamet". Sakupljali smo odjeću za zimu i uručili Udruženju pomozi.ba za one kojima je najpotrebnija, obilježili smo Dan dječijih prava nošenjem plavih majica, te izradom panoa. Sudjelovali smo u obilježavanju mentalnog zdravlja u organizaciji Federalnog ministarstva zdravlja i Asocijacije XY, kao i u pošumljavanju sa organizacijom "Let's do it". Učenici I3 organizirali su druženje u kuglani sa prijateljicom Ednom, te prisustvovali predstavi "Svirala", adaptiranoj i za osobe sa invaliditetom, i proveli nekoliko sati u druženju s glumcima. Posjetili smo Udruženje porodica i osoba s poteškoćama u razvoju "Dajte nam šansu".

Prvi veliki samostalni projekt prijedlog realiziran je 14. novembra 2018. godine u 18.30 sati u organizaciji i realizaciji grupe učenika I₄. Ajna Đapo, učenica ovog odjeljenja, velika zaljubljenica u ples i članica plesnih klubova od 10. godine, uz pomoć svojih drugara, inicirala je i organizirala u amfiteatru


škole humanitarnu plesnu reviju. U programu koji je trajao skoro dva sata, pet afirmiranih plesnih klubova i tri školske plesne grupe (dvije iz osnovnih škola i jedna iz Gimnazije) predstavili su svoj rad odlično osmišljenim plesnim performansima. Cijena ulaznice nije bila određena, a sav prikupljen novac organizatorica revije Ajna Đapo odlučila je donirati za liječenje oboljelog dječaka.

Ovo su aktivnosti koje su učenici realizirali od septembra do decembra šk. 2018/19. godine. Veliki broj aktivnosti govori u prilog ozbiljnom i predanom pristupu učenika prvih razreda društveno korisnom učenju. Još mnogo je aktivnosti i projekata društveno korisnog učenja pred nama, predlažemo, organiziramo, realiziramo, evaluiramo... i idemo dalje!

*Koordinatorica društveno korisnog učenja
Suada Krezić, prof.*



DEŠAVANJA U ŠKOLI



Plesna revija Treće gimnazije

Zovem se Ajna Đapo, učenica sam I₄ Treće gimnazije, matematičko-informatičkog smjera. Tokom školovanja mog brata divila sam se beskrajnoj kreativnosti, inovativnim idejama i fantastičnim plasmanima i rezultatima učenika i profesora Treće gimnazije. Nestrpljivo sam čekala vrijeme polaska u Treću. Bila je to ljubav na prvi pogled... Iako sam tek prvi razred, ostvarila sam odličan kontakt sa profesorima i učenicima i mogu reći da sam mnogo ponosna na to.



Bila sam oduševljena idejom društveno korisnog učenja, koje nas učenike "obavezuje" da pokrenemo vlastiti projekt i učestvujemo u društveno korisnim aktivnostima.

S obzirom na to da od malih nogu plešem i da sam članica Plesne reprezentacije Bosne i Hercegovine, odlučila sam da će moj prvi veliki samostalni projekt biti u vezi sa plesom. Nastojala sam realizirati u početku skromnu ideju. Odlučila sam organizirati Plesnu reviju Treće gimnazije, koja će biti humanitarnog karaktera. Revija je bila zakazana za srijedu, 14. novembra 2018. u 18.30 sati u amfiteatru naše škole. Sa nestrpljenjem sam očekivala taj dan i veselila sam se što će ono o čemu sam dugo maštala postati stvarnost. Revija je ujedinila poznate sarajevske plesne klubove, među kojima su: Dance Development Centre/DDC, Plesni centar "Just dance", Plesne klubove "Aster" i "Fresh Generation", Plesna akademija "Romantik", plesne grupe Osnovne škole "Grbavica 2", Osnovne škole "Čamil Sijarić" te naše Treće gimnazije.



Bilo je zaista divno, makar na dva sata ponovo biti u društvu svih tih predivnih ljudi i plesača. Na reviji se nismo takmičili, plesali smo zajedno i kroz 13 fantastičnih plesnih tačaka pokazali smo jedinstvo i uveselili publiku prepunog amfiteatra. Svaki plesni performans nagrađen je gromoglasnim aplauzom. Nadam se da je ovo prva revija u nizu i nastojat ću da ovaj projekt živi i dalje u Trećoj.

Zahvaljujem mojoj profesorici sporta, koordinatorici društveno korisnog učenja, mentorici cijelog projekta, Suadi Krezić, neponovljivoj voditeljici Aidi Hot, prijateljima koji su pomogli u organizaciji i realizaciji revije, profesorima na razumijevanju i prisustvu, plesačima i ostalim gostima koji su odvojili vrijeme i plaćanjem ulaznice pomogli u prikupljanju novčanih sredstava za liječenje oboljelog dječaka, te tako doprinijeli realizaciji još jedne humanitarne akcije u Trećoj gimnaziji.

Ajna Đapo, I₄



Projekt STEM

U okviru implementacije projekata "Unapređenje osnovnog učenja i obrazovanja u Bosni i Hercegovini" (ENABLE - BiH) u našoj školi provodit će se projekt STEM. STEM je akronim od engleskih naziva za prirodne nauke, tehnologiju, inženjersvo i matematiku. Cilj projekta je obezbijediti implementaciju programa STEM u 12 osnovnih i srednjih model škola u četiri model područja kako bi se dao doprinos poboljšanju kvaliteta obrazovanja i bolje pripreme učenika/ca za daljnje etape školovanja i zahtjeve tržišta rada. Naša škola je jedna od odabranih u Kantonu Sarajevo u saradnji sa Ministarstvom obrazovanja, nauke i mladih KS i nevladinom organizacijom Save the Children.

Ovaj projekt ima za cilj da učenici ovladaju ključnim kompetencijama neophodnim za učestvovanje u ekonomiji zasnovanoj na znanju, a pomoću:

- unapređenja ishoda učenja u području matematike, prirodnih nauka, tehnike i informatike te u kroskurikularnom i međupredmetnom području u osnovnom i općem srednjem obrazovanju,
- kvalitetnog inicijalnog obrazovanja nastavnika na univerzitetima u BiH te povezivanja inicijalnog obrazovanja nastavnika sa svim budućim koracima njihovog profesionalnog razvoja.

Save the Children je Trećoj gimnaziji obezbijedio:

- petodnevnu obuku za 13 nastavnika/ca Treće gimnazije (tri nastavnika/ce matematike, tri fizike, dva hemije, dva informatike, jedan geografije, dva biologije) kao uvod u proces programa STEM,
- program mentorisanja svih 13 nastavnika/ca od sedam trenera / mentora STEM / PPDM koji će u toku 2018-2020. školske godine biti profesionalno-savjetodavna podrška za 13 nastavnika/ca koji će činiti tim na nivou škole za uvođenje i postepenu integraciju STEM podučavanja u okviru nastavnog procesa i aktivnosti,
- opremanje jedne STEM učionice / laboratorije u Trećoj gimnaziji u iznosu od 20.000 \$ (STEM oprema uključuje: laptope, multimediju, 3-D printere, STEM alate i videomaterijale, inicijalni repromaterijal, STEM / PPDM didaktiku); STEM učionica/laboratorija će biti resursna prostorija u kojoj će 13 nastavnika/ca Treće gimnazije provoditi nastavu prema programu STEM.



Naši profesori: Amra Čolić, Selma Mešić, Aida Burak, Alisa Ramić, Erna Mujić, Mevludin Maličević, Edina Hodžić, Melisa Tvrtković, Vesna Radović, Aida Ražanica, Abid Zukić, Alma Gibović i Meliha Salihović realiziraju časove prema programu STEM.



Konfučijev institut u Trećoj gimnaziji

Potpisivanje ugovora o saradnji



Sarajevsku prestižnu srednju školu Treću gimnaziju 20. decembra 2018. godine posjetila je delegacija Northwestern Normal Universityja iz Lanzhou, glavnog grada Gansu provincije.

direktor Konfučijevog instituta Univerziteta u Sarajevu, Ning Zhenye, profesor na Konfučijevom institutu Univerziteta u Sarajevu, i Kong Jing, profesorica na Konfučijevom institutu Univerziteta u Sarajevu. Delegaciju iz Kine su dočekali prof. Senada Salihović, direktorica Treće gimnazije, Sedžida Hadžić, profesorica filozofije u Trećoj gimnaziji, i bivši učenik Luka Bošković, koji je uz podršku i pomoć direktorice Salihović i profesorice Hadžić realizirao projekt "Konfučijev institut u Trećoj gimnaziji".

Nakon potpisivanja ugovora o saradnji Treće gimnazije i Konfučijevog instituta, delegaciju su domaćini proveli kroz

školu pokazujući im dosadašnji ogromni napredak nakon razaranja tokom opsade Sarajeva, kao i postignuća učenika na takmičenjima. Potpisivanje ugovora obilježilo je polovinu



Delegaciju su činili: prof. Liu Zhongkui, rektor NNU-a, Quan Xiaohui, direktor Odjela za međunarodnu saradnju i razmjenu NNU-a, Sun Mei, šef Ureda za međunarodnu saradnju i razmjenu Odjela za međunarodnu saradnju i razmjenu NNU-a, La Weixin,



jednogodišnjeg projekta "Konfučijevog instituta u Trećoj gimnaziji" kojim će se kineska kultura približiti učenicima na pojedinim časovima.

Luka Bošković



Gosti na časovima

U sklopu projekta "Konfučijev institut u Trećoj gimnaziji" 27. oktobra 2018. održan je prvi čas kineskog jezika. Otvoren je popularnom pjesmom "北京欢迎你" ("Dobrodošli u Beijing"). Đaci su na zabavan način učili osnove predstavljanja na kineskom jeziku i vježbali su tonove.



Također, održana su dva časa kineske umjetnosti na časovima Likovne kulture profesora Josipa Kovačevića. Učenci prvih razreda prisustvovali su prezentaciji o kineskoj kaligrafiji (书法), te praktično probali na rižinom papiru vodom pisati osnovne kineske znakove. Na drugom času učenici su slušali o historiji umijeća rezanja papira, primjene u današnjem društvu, te izrađivali motive za sreću (shuangxi) i zvijezde.

Učenci IV₁ na času Filozofije s logikom imali su priliku slušati predavanje prof. Ninga Zhenyeya o počecima filozofije u drevnoj Kini s posebnim osvrtom na filozofiju Lao Tsea i Kung Fu Tsea. Naučili smo da je Lao Tse bio fokusiran prvenstveno na univerzum, kosmologiju, tj. ontologiju, dok je Kung Fu Tse ostao zapamćen kao najveći etički mislilac čije je zlatno pravilo: "Nikada ne čini drugome ono, što ne bi želio da drugi učini tebi" i zaista ga trebamo često citirati.

Čak 50 učenika Treće gimnazije zahvaljujući ovom projektu fakultativno ide na časove kineskog jezika. Neizmjereno smo zahvalni prijateljima iz Konfučijevog instituta i našem bivšem učeniku Luki Boškoviću.



Projekt “Ekologija, energija, budućnost”

Već treću godinu učestvujemo u realizaciji projekta “Ekologija, energija, budućnost”, koji implementira nevladino udruženje “Hajde” uz finansijsku podršku Općine Novo Sarajevo. U projekt su uključeni učenici pet srednjih škola sa područja ove općine. Tim naše škole, u kojem je 15 učenika iz III₆ i IV₆, vrijedno je radio na realizaciji projekta, i to u više etapa.



Snimali su dokumentarni film o ekološkoj osviještenosti, o energetskej efikasnosti, te intervjuirali eksperte tog područja. U idućoj etapi učenici su mjerili razdaljinu i emisiju CO₂ na putu od kuće do škole. Kako bi prikupili sve podatke, anketirani su učenici Treće. Također, članovi timova svih škola mjerili su količinu električne energije koju škole troše na rasvjetu, te su zahvaljujući računici i brojanju rasvjetnih tijela u školama došli i do podataka koliko bi se novca uštedjelo uvođenjem LED rasvjete. Uz to, vagan je otpad svih vrsta koji se dnevno proizvede u školama.

Svaka škola dobila je profesionalnu kameru sa stalkom i senzore rasvjete. Završna manifestacija održana je 20. decembra 2018. godine u Međunarodnom centru za djecu i omladinu Novo Sarajevo, gdje je premijerno prikazan dokumentarni film i analiza istraživanja, uz brojne goste iz škola i Općine Novo Sarajevo.

Cilj projekta je podizanje ekološke svijesti, populariziranje obnovljivih izvora energije, te promoviranje ekološkog načina rješavanja problema moderne zajednice, kao i druženje učenika pet sarajevskih škola.

Zahvaljujemo koordinatorici projekta profesorici Almi Gibović, te svim učenicima koji su učestvovali u realizaciji projekta.

*Iman Bostandžić, III₆
Tvrko-Jasmin Dželilović, III₆*



Posjeta gimnazije "Adnan Menderes" iz Istanbula



U okviru projekta "Bratske škole" Treća gimnazija ugostila je školu "Adnan Menderes" iz Istanbula, Republika Turska. Pet učenica iz Istanbula, u pratnji direktora škole İsmaila Ahmetoğlu i profesorice Müge Girgin, tokom razmjene i boravka u Sarajevu, imale su priliku vidjeti glavni grad i posjetiti kulturne centre. Naši gosti su došli u nedjelju, 11. novembra 2018, a istog dana su uživali u vožnji sarajevskom žičarom do naše olimpijske ljepotice. Nakon izleta na Trebević gosti su obišli Baščaršiju i probali poznate sarajevske ćevape.

U cilju boljeg upoznavanja sa čarima i duhom naše države organizirana je posjeta Mostaru i Blagaju, koju je predvodila direktorica Senada Salihović sa profesorom Anelom Tahirbegovićem i učenicima: Ete Zeynep Sena, Lejla Glotić, Zerina Omerbašić, Tarik Jelačić i Selma Zukić. Tokom



putovanja i ugodnog druženja u Mostaru i Blagaju, gosti iz Republike Turske saznali su o historiji ovih gradova, njihovim monumentalnim spomenicima, tradicionalnoj arhitekturi i kulturnoj baštini. Nakon obilaska Starog mosta i Mostara uslijedio je zajednički ručak i posjeta blagajskoj Tekiji, kojom su naši gosti bili posebno oduševljeni. Povratak u Sarajevo nije značio i kraj druženja. Te večeri posjetili smo Narodno pozorište i prisustvovali premijeri baletne izvedbe "Okovani Prometej".

Sljedećeg dana goste iz Istanbula svečano je primio u Vijećnici gradonačelnik Abdulah Skaka, a nakon toga smo ih odveli u obilazak Muzeja "Alija Izetbegović". Učenici



naše škole su ih ugostili na časovima Njemačkog jezika i Biologije, a kasnije su druženje nastavili u šetnji našim gradom. U srijedu, 14. novembra, učenici su prisustvovali času Sociologije, a u večernjim satima pogledali Plesnu reviju u amfiteatru. Ratni tunel posjetili su sljedećeg jutra, a potom su uživali i u ljepotama Vrela Bosne. U petak, 16. novembra, Selma Zukić i Tarik Jelačić svoje su novostečene prijatelje proveli kroz Zemaljski muzej, gdje su učenice upoznate o historiji, kulturi, umjetnosti i prirodnim resursima Bosne i Hercegovine.



Tog dana gosti iz škole "Adnan Menderes" završili su posjetu Sarajevu i Trećoj gimnaziji, ali će se prijateljstvo i saradnja dviju škola nastaviti. Naši gosti iznimno su zahvalni za ugodno i korisno provedeno vrijeme i druženje, a učenike Treće gimnazije u Istanbulu očekuju u bližoj budućnosti. Za sve koji su bili dio ovog projekta i doprinijeli saradnji ostat će jedna lijepa uspomena i nezaboravno iskustvo.

Meliha Kasapović, III,



Decembarški dani kulture

Kao i svaki prethodni, tako je i ovaj decembar u našoj školi započeo euforijom. Naši učenici vrijedno su pripremali svoje predstave za poznati projekt "Decembarški dani kulture". U ovom periodu učenici rado ostaju u školi i u suprotnoj smjeni, te amfiteatar ni ove godine nismo mogli zateći prazan, već ispunjen rekvizitima, raspravama u vezi sa izmjenama scenarija, smijehom, muzikom i glumom. S obzirom na to koliko smo se pripremali, svi mogu pretpostaviti koliko smo uzbuđeni i nervozni bili kada je stigao red na nas da stanemo pred vrata amfiteatra i čekamo da voditelji izgovore naziv naše predstave.



Prvog petka u decembru, u večernjim satima, začuo se i prvi od mnogih aplauza koji su ispunjavali amfiteatar tokom ovog projekta. Led su probili naši drugačići, nakon kojih su na scenu izašli i maturanti urezujući u sjećanje svaki od posljednjih trenutaka na amfiteatarskoj sceni. Publiku i glumce zabavljali su: Plesna sekcija, učenice trećih razreda Lamija Iskrić i Dina Kurtalić izvedbom pjesme "Kao" te školski bend Kontrapunkt.

Kroz prvi dio takmičenja vodili su nas Kristijan Petrović i Elma Slabić. Glavnu nagradu 200 KM i slobodan dan osvojio je I₁ predstavom "Vremena se mijenjaju", u kojoj su skrenuli pažnju na mito i korupciju, ali i na to kako se muzika današnjeg vremena iskvarila, te ne posjeduje umjetničku vrijednost kojom je nekada zračila.

Posljednju priliku za osvajanje nagrade iskoristio je IV₅ predstavom "Tragedija u komediji". Na tragi-komičan način prikazali su korumpiranost našeg društva i njene posljedice.

Učenici prvih i trećih razreda posmatrali su kolege iz suprotne smjene razmišljajući koje promjene trebaju uvesti u svoje tačke. Sedmicu poslije pokazali su kreativnost te ostavili dobar utisak na žiri i publiku. Kroz drugi dio takmičenja vodili su nas maturanti Adna Salković i Kerim Muhović.

Naši prvaci, koji su bili pod najvećim pritiskom, dobro su se snašli pa je glavnu nagradu osvojio I₄ predstavom "Odrastanje u Sarajevu". Pokazali su put odrastanja jednog sarajevskog djeteta od rođenja, osnovne i srednje škole, do diplome ukazujući na to da je svako razdoblje života lijepo na svoj jedinstven način. Publiku su nasmijali poznatim anegdotama iz školskih klupa, te su se svi mogli složiti s time da su zaslužili prvo mjesto.

Što se tiče trećih razreda, projekt im je dobro došao i zbog zblizavanja sa novim kolegama iz odjeljenja. Tačke svih odjeljenja bile su fascinantne, stoga Uprava nije mogla odoljeti a da im svima ne pokloni jedan slobodan dan. Ali, ipak, najbolji od najboljih su proglašeni društvenjaci, III₃, i njihova predstava "Za remizu". Oni su na komičan način predstavili jedan od problema našeg grada, a to je loš saobraćaj.

Pauza je bila ispunjena muzikom. Poslušali smo izvedbu pjesme "Žute dunje" naše Iman Pašić, uz pratnju gitare Edina Bajrića. Zatim je Almedina Hodo, uz pratnju violine Taide Hodo, tarabuke Adina Čolića i gitare Tee Dedić, otpjevala pjesmu "Nedostaješ". Pjesmu "Somebody I used to know" otpjevale su Amra Koldžić, Lamija Suljević, Nejra Buljina i Dina Ganić. Na kraju programa obradovao nas je i školski bend Kontrapunkt koji je digao publiku na noge.





Drago nam je što i uposlenici i učenici svake godine pridaju veliku važnost ovom projektu ulažući trud kako bi se sve realiziralo na najbolji način.

Posebne zahvale upućujemo Upravi škole, žiriju te publici koja uvijek ispuni amfiteatar i pruži najbolju podršku. Našim pobjednicima, ali i učesnicima čestitamo i želimo puno sreće i sljedeće godine.

Amila Gabela, III₅

*Foto: Amel Jašarević, I₄, Nađa Osmanagić, II₇, Ema Ćatić, II₄,
Tajra Osmanagić, III₃, Amina Huko, IV₄, Zerina Osmić, IV₄*



“Kol’ko smijeha, tol’ko muzike”

Dok su nad Sarajevom vejale prve pahulje snijega, članice naše Dramske sekcije sa školskim bendom predstavljala je svoj prvi projekt pod nazivom “Kol’ko smijeha, tol’ko muzike”. U prohladnim večernjim satima 28. novembra 2018. smijeh u amfiteatru prolomio se za vrijeme prve tačke “Indiferentnost mlađe čeljadi”. Učenice su publiku zagrijale smijehom prikazujući nam sliku jedne prosječne bosanskohercegovačke porodice. Česte pojmove i fraze koje koristimo definirale su Zerina Omerbašić i Hana Salom dok su situacije iz naših domova glumile Sumeja Čoko, Hana Rovčanin, Arijana Vereget, Ema Selimović, Adla Veljović i Amina Mahmutagić. U nastavku predstave publiku su oraspoložile učenice trećeg razreda



Ajša Osmanović i Arijana Vereget tačkom “Kol’ko guliš”. Svoj talenat su pokazale glumeći dvije zatvorenice Kazneno-popravnog doma Zenica. Treću tačku “Šalteruša” izvele su učenice Hana Rovčanin i Aida Hot prikazujući svakodnevnu situaciju kojoj nerijetko prisustvujemo čekajući u redu u javnim ustanovama. Na kraju predstave nastupila je Aida Hot svojom stand up tačkom “Može zadnja – ima izać”. Talentirana Aida Hot je na šaljiv i izuzetno slikovit način opisala putovanje tramvajem od kuće do škole.

Projekt su upotpunili članovi školskog benda Kontrapunkt izvedbama popularnih pjesama.

Sve čestitke članicama Dramske sekcije i Kontrapunktu. Posebna čestitka i veliko hvala voditeljici Sekcije profesorici Amili Huseinbašić na pripremi projekta kojeg će publika zasigurno dugo vremena pamti.

Meliha Kasapović, III₅

Foto: Amel Jašarević, I₄, Amra Koldžić, II₄



Posjeta Centru za zdravo starenje Novo Sarajevo

Članice Dramske sekcije su sa profesoricom Amilom Huseinbašić u ponedjeljak, 17. decembra 2018. posjetile Centar za zdravo starenje Novo Sarajevo. Djevojke su za članove Centra izvele predstavu "Kol'ko smijeha, tol'ko muzike". Posjetu je omogućila naša pedagogica Hasija Dedović. Djevojke su bile posebno zadovoljne i sretne što su uspjele nasmijati članove Centra i uljepšati njihovo jutro.



Repriza predstave "Kol'ko smijeha, tol'ko muzike" održana je 20. decembra 2018. u amfiteatru Treće gimnazije.

Ema Selimović, II₅

Životna priča Irfana Ribića

Učenici III₃ u okviru CIVITAS-ovog projekta "Građanin" obrađuju temu "Legalizacija kanabisa u medicinske svrhe". Cilj projekta je unapređenje rada zdravstvenog sistema i pružanje pomoći u liječenju teško oboljelih pacijenata.

Tim povodom času Građanskog obrazovanja / Demokratije i Ljudskih prava prisustvovao je student Akademije scenskih umjetnosti Irfan Ribić, koji je koristeći ulje kanabisa izliječio multiplasklerozu. Poznat je po rečenici "Bolje biti ilegalno živ, nego legalno mrtav".

Gimnazijalci su sa velikom pažnjom slušali Irfanovu životnu priču od trenutka kada je bio nepokretan, njegovim strahovima, borbom sa sistemom, teškoćama prilikom nabavke ulja kanabisa, do trenutka kada se bolest povukla i kada je ponovo stao na noge.

Imali su puno pitanja na koja im je ovaj hrabri student strpljivo odgovarao.

Ismeta Trepalovac, prof.



Izložba u Historijskom muzeju

Članovi sekcije CIVITAS Treće gimnazije, s profesoricom Ismetom Trepalovac, prisustvovali su otvaranju izložbe učeničkih radova i istraživanja nastalih u okviru projekta "Kulturno naslijeđe, mladi i inovacije: istaknuti značaj kulturne baštine Bosne i Hercegovine kroz umjetnički izraz".

Izložba je otvorena u Historijskom muzeju Bosne i Hercegovine, a otvorili su je ambasadori Njemačke i Francuske u BiH.



Na izložbi su predstavljeni radovi 20 škola u formi plakata, zajedno sa popratnim materijalima, maketama, fotografijama i videomaterijalom. Rad učenika naše škole – zvekir izazvao je veliku pažnju posjetilaca, koje je posebno interesirala funkcija ovog predmeta i tehnika njegove izrade.

Maketa zvekira i plakat izloženi su u holu Treće gimnazije, a gimnazijalci sa Vilsonova dobili su certifikate.

Projekt je realiziran u sklopu Francusko-njemačkog kulturnog fonda 2018, a realizirali su ga Goethe-Institut i Francuski institut, u saradnji sa Historijskim muzejom BiH.

Prošla, 2018. je godina Evropske kulturne baštine. Tim povodom Goethe-Institut i Francuski institut pozvali su škole iz cijele Bosne i Hercegovine da nanovo istraže i osvijeste svoju kulturnu baštinu.

Ismeta Trepalovac, prof.

Obilježavanje Dana dječijih prava

Učenici Treće gimnazije Sarajevo i ove godine su brojnim aktivnostima obilježili Međunarodni dan dječijih prava.

Tako su učenici III₁, III₂ i III₃, skupa sa članovima sekcije CIVITAS, na veoma kreativan način izradom panoa predstavili svoja prava, ali i obaveze.



Također su učenici I₅ razreda, u okviru projekta Društveno korisno učenje, simboličnim nošenjem plavih majica i govorom o Danu dječijih prava senzibilirali vršnjake, ali i odrasle na potrebu poštivanja dječijih prava u cijelom svijetu.

Pri tome su na časovima Historije i Geografije učenice Iman Osmanović i Merima Glušac prezentirale tekst, koji je pripremila Kanita Obhodaš, o dječijim pravima i aktivnostima UNICEF-a na zaštiti prava ove najosjetljivije grupe.

Radeći na projektu učenice Adle Veljović stekli su znanje koje će im pomoći da prepoznaju kršenje dječijih prava, ali i mehanizme njihove zaštite.

Ismeta Trepalovac, prof.

Uspješna realizacija DSD-ispita

DSD II ispit se svake godine održava pred kraj prvog polugodišta. Ove godine je pismeni dio ispita održan 28. novembra 2018. godine čitaonici za Njemački jezik. Pismenom dijelu ispita su pristupila 24 učenika. Ispit je organizirala profesorica Sanela Omeragić, uz pomoć profesorice Azre Bećirović. Rezultate ispita očekujemo na proljeće 2019. godine.

Usmeni dio ispita održan je 20. i 21. decembra 2018. godine.



Pred Komisijom u sastavu: Thomas Polland - predsjedavajući, Emira Hadžimuratović – ispitivač, i Azra Bećirović – članica, dvanaest učenika polagalo je ispit 20. decembra 2018. Direktorica Senada Salihović i zamjenica Amra Čolić su prisustvovala jednom dijelu ispita i u srdačnom razgovoru sa savjetnikom Thomasom Pollandom dale su podršku projektu DSD-programa.

Jedanaest učenika polagalo je ispit 21. decembra 2018. pred Komisijom u sastavu: Thomas Polland - predsjedavajući, Emira Hadžimuratović - ispitivač, i Mara Matković - članica. Učenici su i prvog i drugog dana veoma uspješno prezentirali svoje teme i pokazali zavidan nivo znanja njemačkog jezika koje su stekli u troipogodišnjem radu sa profesoricom Šejlom Brkić-Delalić. Dodatne časove pred ispit učenici su imali sa profesoricom Emirom Hadžimuratović.

Devetnaest učenika položilo je C1 nivo, a dva učenika B2 nivo znanja.

Ispite su nadzirale profesorice Džemilamna Džananović i Azra Bećirović. Tehnički dio posla besprijekorno je obavio Edin Merzić.

Srdačne čestitke učenicima na postignutim rezultatima, uz nadu da će im ova diploma u budućnosti biti od višestruke koristi.

Emira Hadžimuratović, prof.

“Sarajevski Sherlock”

Moj razred, III., 18. oktobra 2018. prisustvovao je posebnom događaju, šetnji pod nazivom “Sarajevski Sherlock”. Nekoliko dana prije naša profesorica Njemačkog jezika Džemilamna Džananović nas je upoznala o radu Fondacije “Kulturno naslijeđe bez granica” i Festivalom raznolikosti koji se u organizaciji ove Fondacije realizira u našem gradu. Na prijedlog profesorice Džananović odlučili smo da dio slobodnog vremena posvetimo jednoj od manifestacija u okviru ovog Festivala i uputili smo se sa vodičem i ostalim zainteresiranim u šetnju uz želju da na jedan drugačiji način upoznamo Sarajevo i doprinos nacionalnih manjina našem kulturnom naslijeđu.



Šetnja je krenula sa Trga Karla Paržika, a za dva sata smo se našli kod Brusa-bezistana. Na toj ruti smo bar na trenutke bili dio prošlosti našeg grada i države. Vodič nam je prenio detalje i priče za koje do tada nismo znali o svakoj građevini, procesu njenog nastajanja, arhitektama. Posjetili smo Crkvu svetog Josipa, Marijin Dvor, Eiffelov most, objekt današnje Akademije likovnih umjetnosti u Sarajevu koji je bio prva i jedina Evangelistička crkva u vrijeme austrougarske uprave. Na tom putu ispred nas se našao i jedan od najzanimljivijih mostova, a to je Festina lente ili Požuri polahko. Zatim smo posjetili Narodno pozorište za koje smo saznali da je imalo veoma zanimljivu historiju, i današnji Bosanski kulturni centar. Sljedeća stanica je bila Aškenaška sinagoga, a onda smo naše putovanje završili u Brusa-bezistanu.

“Sarajevski Sherlock” otkrio nam je neke (ne)vidljive priče i pojedince koji su dali značajan doprinos razvoju našeg grada. Većina ljudi putuje i upoznaje druge gradove, države i kulture, a o vlastitim malo zna.

Aida Hot, III,

Maturanti dobrovoljno darovali krv

Treća gimnazija tradicionalno učestvuje u humanitarnoj akciji dobrovoljnog darovanja krvi u okviru Programa obezbjeđivanja krvi za povrijeđene i oboljele u FBiH u saradnji sa Zavodom za transfuzijsku medicinu FBiH.



Naši punoljetni maturanti pokazali su humanost i dobrovoljno darovali krv 24. oktobra 2018. Maturanti su prije odlaska na Transfuziologiju imali predavanje o zdravlju, prevenciji bolesti, vrijednosti krvi za život čovjeka i društvenom značaju darovanja krvi. Na Transfuziologiji im je određena krvna grupa i urađena analiza krvi. Svi maturanti koji su učestvovali u akciji dobili su kartice i postali članovi, dobrovoljni davoci krvi.

Abela Rastoder, IV₂

Ispraćaj u mirovinu naših dragih uposlenika

Krajem 2018. ispratili smo u mirovinu dvoje naših dragih uposlenika Zumru Smječanin i Suada Hadžića. Naša Zumra provela je radni vijek, 40 godina u Trećoj. I najteže trenutke, od 1992. do 1995, provela je radeći u našem kolektivu.

Domaru Sudi, dugogodišnjem uposleniku, učenici III₃ priredili su veliko iznenađenje organizirajući ispraćaj u amfiteatru.

Kolektiv Treće gimnazije ispratio je naše uposlenike poželjevši im dug, miran i ugodan život.



Završetkom prvog polugodišta i 2018. naš dragi kolega Suad Hodžić otišao je u mirovinu. U svom radnom vijeku Suad je obavljao posao školskog domara veoma uspješno.

Osjećam potrebu da napišem nekoliko rečenica za velikog muzičara starog kova. Možda neki nisu ni znali da je Suad bio aktivni svirač u mladosti, a i kasnije je rado svirao sa svojim društvom. Uvijek je bio spreman, raspoložen i otvoren za rješavanje nastalih kvarova i problema u vezi sa nastavnim pomagalicama i općenito. Meni kao profesorici muzičke kulture i Muzičkoj sekciji je svesrdno pomagao. Znalo se, ako je Suad u smjeni, zamijenit će žice na gitari, naći adapter za sintisajzer, popraviti pedalu za bubanj i mnoge druge stvari. Pratio nas je na mnogim nastupima u Kantonu, čuvao i nosio instrumente, a često bi kao iskusni svirač uzimao gitaru i svirao sa školskim bendom. Želim da mu zahvalim za sve što je činio za nas i da ponese lijepe uspomene iz Treće gimnazije. Želimo mu dobro zdravlje i da nas posjeti kada god osjeti nostalgiju.

Kamenica Aida, profesorica

Podjela paketića

Decembar je u Trećoj gimnaziji odisao svečanom notom predstojećih praznika. Brojni projekti i manifestacije uljepšali su iščekivanje Božića, Nove godine, ali i nastupajućeg zimskog raspusta. U četvrtak, 27. decembra 2018. godine, u prigodno dekoriranom amfiteatru naše škole, upriličena je i ceremonija podjele novogodišnjih paketića djeci uposlenika. Uobičajenu atmosferu radnog dana u večernjim satima su zamijenili dječiji koraci, osmijesi i ushićenje. Učenici III₂ izveli su predstavu "Audicija za vilenjaka", zabavivši najmlađe i spojivši brojne talente u jednu razigranu tačku. Djeda Mraz je mališanima uručio paketiće te je pjesmom i plesom zatvorena i ova manifestacija.

Abela Rastoder, IV₂



Godišnjica mature generacije 1994–1998.



U junu 2018. godine ispred Treće gimnazije 20 godina nakon mature okupila se generacija 1994-1998. Ratna smo generacija koja je u najgore doba morala uredno izvršavati školske obaveze koje su nerijetko bile prekidane uzburama i odlascima u skloništa. Iako nam je bilo vrlo teško usredotočiti se na školovanje, mnogi su danas uspješni u poslovima koje obavljaju. Vesela i nasmijana lica, puno uspomena, sjećanja, emocija....

Nikada nismo izgledali mlađe i ljepše!

Melisa Tvrtković, prof.



Evropski dan jezika




Učenci trećih razreda jezičkog smjera su se na časovima Njemačkog jezika sa profesoricom Džemilamnom Džananović prigodnim projektnim i nastavnim aktivnostima upoznali o Evropskom danu jezika i značaju njegovog obilježavanja. Koristeći u radu na svom projektu digitalnu alatku *Padlet* učenice III₁ su pisale i prezentirale sastave i mišljenja o višejezičnosti, promišljale i iznosile stavove o potrebi učenja stranih jezika te razvijanja interkulturalne kompetencije, davale savjete za učenje jezika, pisale o iskustvima o temi *Europa und ich, Mein Europa...* Rezultat projekta je jedan vrlo vrijedan digitalni *Padlet* plakat koji će služiti kao zajednički podsjetnik na realizaciju ovog projekta i kao zbirka kvalitetnih tekstova o temi Evropa i jezici za daljnje učenje i rad na nastavi Njemačkog jezika.

Učenci trećeg razreda DSD-programa o manifestaciji Evropski dan jezika su upoznati zahvaljujući interaktivnoj igri *EU-Spiel*, koju je kreirao Österreich Institut Wien, i mi zahvaljujemo Austrijskom institutu u Sarajevu koji nam je ustupio ovu igru.

Panel povodom Međunarodnog dana srednjoškolaca

Međunarodni dan srednjoškolaca, 17. novembar, obilježili su i ove godine članovi Asocijacije srednjoškolaca u Bosni i Hercegovini. U 14 gradova, pa i u Sarajevu, u prostorijama Vijeća mladih Općine Stari Grad, održana je javna panel-diskusija "Vi nas dijelite u obrazovanju, a van granica nas ne dijele!". Među panelistima bila je i naša učenica Ema Selimović,



zajedno sa Irmom Ramović i Dževadom Hatkić, također članicama ASuBiH, te moderatoricom panela Almedinom Išerić, PR menadžericom Lokalnog tima Sarajevo. Zerina Osmić, koordinatorica Lokalnog tima Sarajevo, bila je u organizacionom timu panela.

Na panelu su srednjoškolci, ali i njihovi profesori i roditelji govorili o fenomenu "dvije škole pod jednim krovom", obrazovanju u BiH i odlasku mladih iz naše države. Gosti su imali priliku iskazati stavove i mišljenje o ovim i mnogim drugim temama, te postavljati pitanja panelistima.

Ema Selimović, II₅

Socijalni dan 2018



Asocijacija srednjoškolaca u Bosni i Hercegovini (ASuBiH) treći put organizirala je projekt pod nazivom "Socijalni dan 2018" koji se implementirao u petak, 19. oktobra 2018. godine u 45 lokalnih zajednica širom Bosne i Hercegovine. Socijalni dan je projekt koji srednjoškolcima na jedan dan daje priliku da zamijene školske klupe radnim mjestima. Treća gimnazija je i ove godine dala podršku projektu, uz koordinaciju socijalne radnice Amele Muftić-Arapović. Deset učenika imalo je priliku svoje znanje primijeniti u praksi, ali i steći iskustvo koje će im olakšati donošenje odluke o budućem zanimanju.



Koristimo priliku da zahvalimo svim poslodavcima koji su bili dobri domaćini našim učenicima, pružili im priliku da prošire svoja znanja i saznaju nešto novo o profesijama, ustanovama, organizacijama u kojima su bili raspoređeni, a to su: Udruženje Narko-Ne, Ministarstvo unutrašnjih poslova KS, Sol Azur, Burch univerzitet, Općina Stari Grad.

Nakon završenog "Socijalnog dana 2018" socijalna radnica škole je održala sastanak sa učenicima koji su imali priliku prenijeti svoja pozitivna iskustva, razmijeniti mišljenja o poslovima koje su obavljali, te značaju ovog projekta.

Amela Muftić - Arapović, socijalna radnica

Obilježeno 70 godina Deklaracije o ljudskim pravima

Učenici III₆, III₃ i III₁ naše škole su izradom plakata, prezentacijom i prigodnim izlaganjem putem razgleda obilježili 10. decembar - Međunarodni dan ljudskih prava i 70 godina od usvajanja Opće deklaracije o ljudskim pravima.



Istaknuli su značaj Opće deklaracije Ujedinjenih naroda o ljudskim pravima iz 1948. godine u kojoj se naglašava da se sva ljudska bića rađaju slobodna i jednaka u dostojanstvu i pravima. Poslali su jasnu poruku da svi imamo obavezu podizati društvenu svijest i ličnim primjerom ukazati na potrebu poštivanja ljudskih prava i sloboda koji su nam Ustavom Bosne i Hercegovine zagarantirani bez obzira na spol, dob, rasu, nacionalnost, vjersku opredjeljenost ili prema bilo kojim drugim osobinama.

Ismeta Trepalovac, prof.

Dani o Allahovom Poslaniku "Selam, ya resulallah"



U Kino-sali Općine Novi Grad upriličen je svečani program u okviru manifestacije Dani o Allahovom Poslaniku "Selam, ya resulallah". Raznovrsnim kulturno-zabavnim programom predstavili su se učenici osnovnih i srednjih škola Kantona Sarajevo, na kreativan način prikazavši ljubav prema Muhammedu a. s. Našu školu predstavljali su učenici: Almedina Hodo, Abela Rastoder, Adin Čolić, Zerina Aličehajić, Vildana Hamzić, Taida Hodo i Tea Dedić. Izvedbu ilahije "Ti me rani" pripremili su sa profesoricom Islamske vjeronauke Esadom Grabus.

Abela Rastoder, IV₂

Desetogodišnjica PASCH-a u Bosni i Hercegovini

U subotu, 3. novembra 2018. godine, u prostorijama Doma mladih u Sarajevu obilježeno je 10 godina postojanja inicijative PASCH ("Schulen: Partner der Zukunft"), inicijative koja se širom svijeta realizira uz pokroviteljstvo Ureda za vanjske poslove SR Njemačke, a u BiH implementira u saradnji sa Goethe-Institutom, Centralom za školstvo u inostranstvu (ZfA), Njemačkom službom za akademsku razmjenu (DAAD) i Pedagoškom službom za razmjenu (PAD), a omogućila je brojnim učenicima i učenicama PASCH škola iz Bosne i Hercegovine učestvovanje u projektima, manifestacijama i razmjenama širom svijeta.

Kao članica ove inicijative naša škola se rado odazvala ovom pozivu. Cjelokupna realizacija ove manifestacije koja obuhvata kako osnovne, tako i srednje škole diljem Bosne i Hercegovine bila je zamišljena kroz različite projekte, igre, zabavu te prezentacije kojima su učenici najbolje predstavljali svoje škole, a u kojima su ostali mogli interaktivno učestvovati. Treću gimnaziju predstavljalo je pet učenika II₆ DSD odjeljenja, a to su: Mirza Bakal, Adna Čengić, Zana Kapetanović, Martina Kostić i Edina Suljić, uz pratnju profesorica njemačkog jezika Džemilamne Džananović, Sanele Omeragić i Azre Bećirović, uz prezentaciju koja je pratila dugogodišnji rad, te brojna ostvarenja naše škole, a potom i zanimljive igre kojima su mogli pristupiti svi prisutni. Za ovu priliku smo kontaktirali naše uspješne učenike koji su pohađali DSD-program, a koji su dobili DAAD stipendije, studiraju u zemljama njemačkog govornog područja i studente Odsjeka za germanistiku u Sarajevu. Ovim putem im zahvaljujemo na ustupljenim videomaterijalima i razmjeni iskustava. Učenici, kao i posjetitelji iz drugih gradova imali su priliku kroz Stadtrallye (gradsku utrku) i ispunjavanje određenih zadataka uživati u znamenitostima Sarajeva i druženju. Pri povratku u Dom mladih održana je radionica s bosanskohercegovačkim reperom Frenkijem. Uz druženje, te kroz zanimljive radionice i zadatke unaprijedili smo znanje njemačkoga jezika. Ovo je bilo nezaboravno iskustvo, kroz koje smo se potrudili u najboljem svjetlu obilježiti 10 godina PASCH-a u BiH.

Zana Kapetanović, II₆



Tarik Jelačić na Olimpijadi iz geografije

Učestvovao sam na Internacionalnoj olimpijadi iz geografije koja se održavala u Quebec Cityju u Kanadi, od 31. jula do 6. augusta 2018. godine. Na Olimpijadi je učestvovalo ukupno 165 takmičara iz 43 države, a Bosnu i Hercegovinu su pored mene predstavljala još tri takmičara. Takmičarski dio se sastojao iz tri dijela: pisanog testa, terenskog dijela i njegove analize i multimedijalnog testa. Zadaci i pitanja su predstavljali izazov, a posebno mi se dopao terenski rad prilikom kojeg primjenjujemo kompletno znanje iz geografije. To je za mene bio novi koncept učenja i praktičan pristup već naučenom. Iako Bosna i Hercegovina nije osvojila nijednu medalju, pored znanja i naučenog iz geografije, ostvarili smo vrijedna poznanstva i stekli iskustvo koje se ne zaboravlja. Neprocjenjivu

vrijednost predstavljaju svi ljudi sa kojima sam imao priliku komunicirati, koji su puni ideja i dobrih priča koje su mi pružile novu perspektivu. Posebna zahvalu upućujem onim osobama bez kojih se čitava ova priča uopšte ne bi ni desila, a to su direktorica Senada Salihović i moji roditelji, kao i svim ljudima koji su na bilo koji način doprinijeli odlasku u Kanadu: Općini Novi Grad, Udruženju BHAAS i Slavici Hrnraš, Udruženju ZAMBAK iz Kanade i ostalim koji su željeli ostati anonimni.



Tarik Jelačić, IV₆

Svečanost za izvrsne učenike srednjih škola



Ministarstvo za obrazovanje, nauku i mlade Kantona Sarajevo je i ove godine organiziralo svečanost za izvrsne učenike srednjih škola koji su se tokom protekle školske 2017/18. godine posebno iskazali u nastavnim i vannastavnim aktivnostima, te pri realizaciji projekata i promociji svojih škola.

JU Treća gimnazija ima mnogo takvih učenika, pa nije bilo lako odabrati samo jednog od njih. Ipak, jedan učenik je bio izuzetno uspješan - Tarik Jelačić, iz IV₆. Tarik Jelačić je od prvog razreda ostvarivao odličan uspjeh prosjekom 5,0 i primjermim vladanjem. Do sada je pokazivao samo zavidne rezultate na takmičenjima i učestvovao u brojnim vannastavnim aktivnostima.

U nizu njegovih uspjeha izdvajamo treće mjesto na Regionalnom takmičenju iz geografije "Balkanijada" u protekloj školskoj godini, čime se plasirao na Međunarodnu olimpijadu iz geografije koja se prošlog ljeta održavala u Kanadi. Tarik Jelačić je time na najbolji način predstavio ne samo našu školu već i našu državu. Tarik Jelačić je u pratnji direktorice prisustvovao svečanosti u petak, 7. septembra 2018. godine u Domu mladih Skenderija prilikom koje su najboljim učenicima srednjih škola Kantona Sarajevo uručena priznanja i nagrade.

Sara Ažman, reprezentativka BiH u ritmičkoj gimnastici

Sara Ažman, učenica II₆, već dugo godina je perspektivna sportistkinja u ritmičkoj gimnastici. Trenira u Klubu ritmičke gimnastike "Bosna gym" i također jedna je od članica reprezentacije Bosne i Hercegovine. Ostvarila je mnogobrojne rezultate kako na državnim, tako na međunarodnim takmičenjima širom Evrope. Kakva su njena iskustva saznajte iz ovog intervjua.



Koliko dugo se baviš ovim sportom i kako je sve počelo?

Ritmičkom gimnastikom se bavim već deset godina. Osoba koja me je upoznala sa ovim sportom je moja nana Jasminka Mutevelić, koja je i sama bila takmičarka i sudija ritmičke gimnastike. Ona me upoznala sa sadašnjom trenericom Aidom Hadžić i odmah je nastala velika ljubav prema ovom sportu.

Zašto baš gimnastika, uzimajući u obzir da taj sport nije toliko popularan?

Prvi dan kada sam kročila u salu, zaljubila sam se u ovaj sport. Sve osobine koje krasi jednu djevojčicu, pa zatim djevojku, kriju se u osnovama ovog sporta. Sve je podređeno pojmu lijepog pokreta: muzika, trikovi, elegancija...

Šta te najviše motiviralo da treniraš toliko dugo i da ne odustaješ?

Najveća motivacija bile su mi djevojčice koje su gledale u mene kao u uzor. Smatrala sam da se moram nastaviti truditi da sebe ne bih razočarala, pa onda i njih.

Možeš li opisati jedan svoj dan, kako izgleda kada moraš uskladiti tolike treninge sa obavezama u školi?

S obzirom na to da pohađam jednu od zahtjevnijih gimnazija u gradu, moj dan može biti veoma stresan. U školi sam od 8h do 15h, na treningu od 17 do 21h, pa onda mali odmor i brzo na učenje. Sve je ovo doista naporno, ali uz dobro planiranje i raspoređivanje obaveza, sve se može stići na vrijeme.

Ko je tvoja najveća podrška?

Titulu najveće podrške ću sigurno predati svojim roditeljima i porodici koji su uvijek

bili tu za mene, motivirali me, ohrabivali na treninzima, tribinama i takmičenjima.

Prilikom nastupa na takmičenjima, koji ti je rekvizit najdraži i zašto?

Trenutno ne mogu izdvojiti najdraži rekvizit, ali tokom godina su mi čunjevi bili najdraži. Na treninzima uvijek rado radim koreografije sa njima jer idu uz veselu muziku, što odgovara mom karakteru.

Ti si jedna od najmlađih takmičarki u BiH koja se natjecala na ovako velikom takmičenju. Kakva su tvoja iskustva sa Svjetskog prvenstva?

Iskustva sa Svjetskog prvenstva će mi uvijek biti prikazana u najljepšem svjetlu. Sama činjenica da sam sa 15 godina predstavljala Bosnu i Hercegovinu na Svjetskom prvenstvu je fascinantna. Ponosna sam na sebe i svoje kolegice što smo zajedno bile dio najboljeg tima i time otvorile vrata mnogim mlađim takmičarkama naše domovine. Neprocjenjivo veliko i drago iskustvo je trenutak kada sam izašla pred punu dvoranu gledalaca i sudija i izvela najbolji nastup pod zastavom svoje domovine.

S obzirom na to da toliko treniraš, da li se to odrazilo na tvoje zdravlje, školu, društvo?

Pošto treniram 10 godina, sport je moj život. Poznata sam po tome da mnogo treniram, ali uvijek pronađem vremena za druženje. Škola mi je uvijek na prvom mjestu, ali i kada nešto ne stignem zbog svih obaveza, profesori imaju razumijevanja.

Koji su tvoji najveći uspjesi pored nastupa na Svjetskom prvenstvu?

Posebno sam ponosna na svoje nastupe na Mediteranskim igrama u Tarragoni, u Španiji, 2018. godine. To je bilo moje prvo veće takmičenje na kojem sam zauzela 25. mjesto. Osim Mediteranskih igara višestruka sam prvakinja Bosne i Hercegovine i osvajačica medalja na balkanskim prvenstvima.

Kako bi motivirala djevojčice da se bave gimnastikom?

Ritmička gimnastika uopće nije lagan sport. Ona zahtijeva mnogo odricanja i mnogo truda i rada, to je evidentno. U mnogo navrata sam pomislila da odustanem, da ne mogu više, ali moja želja za uspjehom i osjećaj nakon dobro odrađenog treninga ili takmičenja su ono što me zadržalo u ovom sportu. Mislim da je veoma teško uskladiti sve obaveze sa intenzivnim treniranjem, ali to sve donosi predivne nagrade i osjećaj uspjeha. Smatram da svako ko želi uspjeti i ko ima jasan cilj, ništa ga ne može spriječiti da ga ostvari.

Amina Huko, IV₆



Edna Šunjić - Zlatna medalja kao posveta djeci Bosne i Hercegovine s Down sindromom

Znamo da se Treća gimnazija uvijek može pohvaliti svojim učenicima i njihovim radom pa tako, ovaj put, posebnu pohvalu želimo uputiti našem prvačiću, Edni Šunjić. Iza Edne je veliki broj uspjeha, pohvala i medalja kako u sportu, tako i u školi.



Shvativši da nakon školovanja sistem ništa ne nudi djeci s poteškoćama, mama Sabina zaključila je da je sport najbolji izbor. Najprije je krenula sa plivanjem. Onda je na red došao stoni tenis. Edna je učestvovala na međunarodnom takmičenju Sportske igre Oaze koje se održavalo od 3. juna do 6. juna 2018. godine u Sarajevu, a na kojem se takmičilo 550 sportista iz BiH i regiona. U dosta starijoj kategoriji Edna je osvojila treće mjesto i bronzanu medalju u plivanju i treće mjesto i bronzanu medalju u stonom tenisu. Edna je reprezentativka Bosne i Hercegovine u alpskom skijanju. Na Specijalnoj olimpijadi, gdje je prošle godine u Austriji bila jedna od najmlađih takmičarki, osvojila je dvije zlatne medalje.

Prva zlatna medalja stigla je 21. marta za Dan Down sindroma. Prvo Ednino zlato bilo je posvećeno svoj djeci s Down sindromom u Bosni i Hercegovini.

“Moram naglasiti kako nas je na povratku ministar Kurić dočekaao, iste večeri je bila reprezentativna fudbalska utakmica u Zenici i on je organizovao da odemo i da Edna izađe na teren. Potom je otvorila sa drugom djecom s poteškoćama skijašku sezonu. Važno je i napomenuti da je podržao da Pozorište mladih bude prilagođeno djeci s poteškoćama. Edna sada ima status istaknute sportistkinje



koji je dobila od Ministarstva civilnih poslova BiH i Ministarstva kulture i sporta Kantona Sarajevo”, rekla je mama Sabina Šunjić.

Ne samo da je odlična sportašica već je Edna kao glumica bila dio predstave “Svirala” koja je na Internacionalnom festivalu MESS, održanom u Sarajevu od 29. septembra do 5. oktobra, dobila Zlatni lovorov vijenac, sa ocjenom 10!

Veliku zahvalnost upućujemo Edni i, kako je ona naziva, njenoj najvećoj podršci, njenoj majci, Sabini Šunjić, što su izabrale baš našu školu u kojoj će Edna, sigurni smo, razviti svoju ličnost i doživjeti najsretnije godine u životu. Ponosni smo na to što imamo priliku dijeliti školske klupe sa ovako ambicioznom djevojčicom koja svojim primjerom pokazuje i dokazuje da je za uspjeh potreban rad i jaka želja, te da nas


ništa drugo ne može spriječiti u postizanju istog.



Faruk Terzić, viceprvak BiH

Učenik III₆ Faruk Terzić trenira bilijar u Bilijar klubu Predator u Sarajevu. Trenutno je na "BH Tour" turniru, na kojem učestvuju igrači iz cijele Bosne i Hercegovine, rangiran na drugom mjestu (od ukupno 71 igrača) odmah iza aktuelnog svjetskog i višestrukog evropskog prvaka Sanjina Pehlivanovića, klupskog suigrača.

Početkom septembra 2018. Faruk je učestvovao na "Čačak 9 Ball Open Tournamentu", gdje je u konkurenciji 87 igrača iz Srbije, Makedonije, Grčke, Hrvatske, Slovenije, Crne Gore i Bosne i Hercegovine i osvojio treće mjesto i pehar.



Kros

Osvanuo je svjež i energičan petak, 28. septembar 2018. za učesnike ovogodišnjeg jesenjeg krosa u trčanju. Ukupno je bilo 20 trkača iz naše škole koji su dali sve od sebe i timski osvojili drugo mjesto. Profesorica Suada Krezić je pružila nesebičnu podršku svim učesnicima i inspirisala takmičare da daju svoj maksimum. Faris Delić je osvojio šesto, a Amar Hasečić osmo mjesto. Od učenica Zerina Osmić je osvojila deveto, a Lamija Džaferović petnaesto mjesto. Optimizam i veselo raspoloženje su naši fotografi uspjeli i zabilježiti svojim fotoaparatom. Nakon dana ispunjenog uzbuđenjima odlučili smo se počastiti ukusnim palačincima u "Žutom kutku".



Osmi Izvor film festival

U subotu, 27. oktobra 2018. održan je 8. Izvor film festival. Predstavnice škole bile su Aida Hot i Selma Zukić, sa svojim filmom "Ego". Filmom su ispričale priču o borbi jedne djevojke sa bulimijom, te za svoj rad osvojile Nagradu publike za najbolji film, kao i Nagradu za najbolju glumicu. Ulogu djevojke je tumačila bivša učenica naše škole Amela Kuloglija.

Aida Hot, III₁



S.ketch 8. Street basketball 2018



Na platou ispred BBI centra održan je turnir u uličnoj košarci "S.ketch Street Basketball" od 15. do 17. septembra 2018. Na turniru je učestvovalo više od 60 ekipa, od kojih su i dvije iz naše škole.

Naša mlađa ekipa, u kategoriji do drugog razreda srednjih škola (u sastavu: Đip Faris, Trbonja Timur, Junuzović Mirza i Pašalić Ismail), odigrala je šest utakmica. U prvom kolu je savladala KŠC Mejtaš rezultatom 15:0, dok su u drugom kolu bili bolji od Srednje ugoditeljsko-turističke škole rezultatom 15:4. U utakmici trećeg kola naši momci bili su bolji od Gazi Husrev-begove medrese i rezultatom 11:5 plasirali se u četvrt finale. Njihov naredni protivnik bila je Gimnazija Obala koju su zahvaljujući velikom trudu i fantastičnoj igri savladali 14:12 i tako se plasirali u polufinale. U polufinalu naša ekipa je savladala ekipu Pete gimnazije 15:9 i tako je došla do finala. U finalnoj utakmici njihov protivnik bila je ekipa Prve gimnazije. Nažalost, izgubili smo 14:3, te tako završili turnir kao drugoplasirani.

Naša starija ekipa, u kategoriji do četvrtog razreda srednjih škola (u sastavu: Osmanspahić Emir, Salić Kerim, Bajramović Amar i Kukuruzović Haris), odigrala je četiri utakmice.

U prvom kolu su pobijedili ekipu iz Gimnazije Obala rezultatom 9:5, a u drugom kolu bili su bolji od ekipe Srednje medicinske škole i rezultatom 14:10 došli do polufinala. U polufinalu njihov protivnik bila je ekipa Gimnazije Obala i rezultatom 11:6 plasirali su se u finale. Uprkos velikom trudu i borbi na terenu savladani smo od momaka iz Srednje ekonomske škole, te smo osvojili drugo mjesto na turniru.

Čestitamo našem timu i želimo im mnogo uspjeha u narednim takmičenjima!

Amina Huko, IV,



Školski turnir u malom nogometu

Naša tri maturanta: Šošić Amar, Abaza Mirza i Delić Aid 16. septembra 2018. organizirali su školski turnir u malom nogometu. Učestvovalo je osam razrednih ekipa, a pobjedu je odnio III₃. Organizator Amar Šošić izjavio je da ćemo vidjeti magiju na terenu u što su se navijači imali priliku uvjeriti nakon dugog dana vedrog raspoloženja, neumorne energije i dobre igre. Uljepšana nam je prva nedjelja ove školske godine, a mladi momci su pokazali da učenici u Trećoj gimnaziji mogu samostalno organizirati i uspješno realizirati jedan kvalitetan događaj.

Arneta Obralića, IV,



Atletski kup srednjih škola Općine Novo Sarajevo

Treća gimnazija nastavlja svoj niz uspjeha na sportskim takmičenjima, a ovaj put donosi zlatni pehar sa atletskog takmičenja.

Atletski kup srednjih škola Kantona Sarajevo, općinski nivo, održan je 3. oktobra 2018. u Centru "Safet Zajko". Naša ekipa je vrijedno radila i spremala se za ovo takmičenje. Sav taj trud se isplatio jer je smo osvojili prvo mjesto! Najbolji rezultati bili su:



Prva mjesta:

Delić Faris (100m),
 Osmić Zerina (100m),
 Gušo Sanjin (400m),
 Bećirbegović Amila (400m),
 Imamović Lamija (600m),
 Dervić Ajdin (skok u dalj),
 Huko Amina (skok u dalj),
 Muška štafeta (4x100m),
 Ženska štafeta (4x100m).

Druga mjesta:

Ažman Sara (100m),
 Abaza Mirza (400m),
 Gondžo Tarik (1000m),
 Agić Iman (600m),
 Hasečić Amar (skok u dalj),
 Velić Zerina (skok u dalj),
 Ušto Enes (bacanje kugle).

Treća mjesta:

Alikavazović Aldemar (100m),
 Tarin Husić (400m),
 Dudo Amina (bacanje kugle).

Čestitamo svim našim takmičarima na uloženom trudu i postignutim rezultatima i želimo im i u budućnosti da budu ovako uspješni!

Huko Amina, IV₆



Gimnazijada

Treća je šampion!



Od 30. oktobra do 1. novembra 2018. održano je ugledno sportsko takmičenje, jubilarna dvadeseta sarajevska Gimnazijada. U dvije sportske discipline, košarci i stonom tenisu, u muškoj i ženskoj kategoriji, takmičilo se više od 200 učenika svih sarajevskih gimnazija. Otvaranje je, naravno, započelo himnom naše domovine i veselo nastavilo nastupom plesne grupe Prve gimnazije. Gimnazijadu je svečano otvorila Emina Pašukan, učenica Prve gimnazije i najperspektivnija sportistkinja Bosne i Hercegovine.

Prvi ovogodišnji meč bio je između Treće gimnazije i Prve bošnjačke gimnazije u muškom stonom tenisu. Naši momci

Adnan Hajrić i Ervin Vladić, nažalost, nisu uspjeli nadvladati svoje protivnike te su izgubili rezultatom 11:5.

Ženska ekipa stonog tenisa Alemka Hasečić i Ilma Erović su pobijedile ekipu Druge gimnazije, te se tako plasirale dalje. Naredni protivnik im je bila ekipa iz Prve gimnazije. Zahvaljujući velikom trudu i radu naše djevojke su pobijedile ekipu Prve gimnazije rezultatom 3:1 te su tako ušle u finale protiv ekipe Katoličkog školskog centra koju pobjeđuju i osvajaju **PRVO MJESTO**.

U sportskoj dvorani "Jezero" odigrane su utakmice u muškoj i ženskoj košarci. Ženska ekipa Treće gimnazije igrala je u sastavu: Huko Amina (C), Rastoder Abela, Hasković Irma, Čekić Ilma, Boschiero Dejna, Buljina Nejra, Šabotić Amra, Pirija Sabrina, Milišić Berina i Đulančić Melika. Prvi protivnik bila im je ekipa Druge gimnazije. Na našu žalost, uprkos velikom trudu i doista neizvjesnoj utakmici, naše djevojke su poražene rezultatom 18:23 te su tako završile svoj nastup na ovogodišnjoj gimnazijadi.

Muška košarkaška ekipa igrala je u sastavu: Panjeta Tarik (C), Berberović Orhan, Trbonja Timur, Đip Faris, Bašić Omar, Bajrović Bakir, Bajramović Amar, Šehović Sadin, Osmanspahić Emir, Salić Kerim, Kurtanović Emir i Kukuruzović Haris. Momke je u prvom





kolu dočekala ekipa Dobrinjske gimnazije. U veoma dobroj atmosferi Treća gimnazija odnosi pobjedu rezultatom 50:31 te se tako plasira u finalno kolo. U finalu za prva tri mjesta igrane su ekipe Druge, Pete i Treće gimnazije. U prvoj finalnoj utakmici snage su odmjerile ekipe Druge i Treće gimnazije. U doista zanimljivoj utakmici, nakon četiri četvrtine igre, pobjedu odnosi naša ekipa rezultatom 32:23 a pri tome su se posebno istakli igrači Bajrović Bakir i Osmanspahić Emir. Nije bilo mnogo vremena za odmor jer je odmah nakon odigrane utakmice naše momke čekala utakmica protiv Pete gimnazije. Zahvaljujući velikoj borbenosti naših igrača i podršci sa tribina, ekipa Treće gimnazije je pobijedila rezultatom 28:27 te su tako osvojili **PRVO MJESTO**.

Uz prigodan program i dodjelu diploma zatvoreno je najveće gimnazijsko takmičenje u Sarajevu. Sa osvojena dva prva mjesta u ženskom stonom tenisu i muškoj košarci Treća gimnazija je zauzela zlatno **PRVO MJESTO** u ukupnom plasmanu na 20. sarajevskoj Gimnazijadi. U sportskoj dvorani "Jezero" nakon zatvaranja čuo se aplauz i euforično navijanje: "Bit će Treća opet šampion!"


Ponos zbog ovogodišnje pobjede osjećat ćemo cijelu ovu školsku godinu, a bit će nam velika motivacija i za narednu. Zahvaljujući talentu i trudu naših sportista kao i bezrezervnoj podršci naših navijača opet ćemo imati priliku ušetati u školu i uzviknuti: "Treća je prva!"

Obralija Arnela, IV₂, Huko Amina, IV₆

Foto: Dedić Tea, I₂, Jašarević Amel, I₄, Osmanagić Nađa, II₁, Osmanagić Tajra, III₅, Polić Ajdin, IV₁



Školski izlet



Školski izlet je organiziran 26. septembra 2018.

Naši prvacići su odlučili da prvo druženje s novim drugovima i drugaricama provedu u Sportsko-rekreativnom centru "Ajdinovići". Dan su proveli u sportskim nadmetanjima, razgovorima, šetnji, upoznavanju, stvaranju novih uspomena i iskustava.



Učenici drugih razreda posjetili su Konjic. U okviru posjete organiziran je odlazak u Titov bunker, a nakon toga obišli su kulturno-historijske znamenitosti ovog grada.





Učenci trećih razreda ovaj dan proveli su u Sportsko-rekreativnom centru Brus na Trebeviću. Hladnom vjetru suprotstavljali su se veoma toplom atmosferom.

Neki maturanti posjetili su Mostar i uživali u ljepotama i suncu ovog hercegovačkog grada, dok su drugi, uz pratnju razrednika, obišli sarajevske institucije kulture.

Druženja, ugodne atmosfere, šala, novih prijateljstava, iskustava nije nedostajalo.



Planinari na Trebeviću

Članovi Planinarske sekcije, u pratnji profesora Abida Zukića, žičarom su stigli do Trebevića, gdje su uživali u lijepom vremenu i čistom zraku, okruženi dobrim društvom i prirodom. Iskoristili su priliku međusobno se upoznati i zbližiti, ali i naučiti ponešto o planinarenju, orijentaciji u prostoru i planinama kojima je okružen naš grad.

Helena Bogdanović, II₅



Posjeta Srebrenici



Učenici drugih razreda Treće gimnazije su, zajedno sa učenicima Srednje ekonomske škole i Srednje škole za okoliš i drveni dizajn, posjetili Memorijalni centar Potočari 24. oktobra 2018, čiju je posjetu finansiralo Ministarstvo za obrazovanje, nauku i mlade Kantona Sarajevo.

Nakon četverosatne vožnje stigli smo u Potočare, mjesto koje ukazuje na brutalnost posljednjeg rata. Nažalost, poznato je po tužnom događaju, odnosno genocidu, o kojem smo mnogo naučili tokom naše posjete. Pogledavši film o genocidu ozbiljnost i tuga obuzeli su nas, a prolazak kroz muzej je pojačao ta osjećanja. U znak sjećanja na poginule izloženi su mnoge fotografije, videozapisi i predmeti. Tokom

rata u Potočarima su se našle hiljade izbjeglica iz Podrinja i Srebrenice misleći da su u „zaštićenoj“ zoni pronašli sigurnost. Utočište su razoružani Srebreničani pronašli u bivšoj fabrici akumulatora, odnosno u bazi holandskog bataljona, međutim, pomoć od Ujedinjenih nacija nisu dobili. Nakon obilaska nijeme fabrike, koja ima mnoga toga ispričati, posjetili smo Memorijalni centar Potočari.

Bila je to upečatljiva i edukativna, ali i veoma tužna posjeta. Ostat će urezana u pamćenje. Još jednom smo se podsjetili na to šta zapravo predstavljaju posljedice rata, ko ih najčešće i najviše trpi, te koliko rat mijenja društvo.

Mirza Bakal, II₆



Studijska posjeta Beogradu

U subotu, 3. novembra 2018. učenici trećih razreda naše škole krenuli su ka Beogradu, na još jedno nezaboravno putovanje.

U Beograd smo stigli u juturnjim satima. Prvo smo posjetili Kalemegdan, a vodič nam je objašnjavao svaku znamenitost ovog dijela grada. Zatim smo prošetali najpoznatijom beogradskom ulicom - Knez Mihailovom, a potom se uputili u hotel Jugoslavija, gdje smo se smjestili i odmorili od puta.

U nedjelju smo posjetili muzeje. Podijelili smo se u dvije grupe, po tri odjeljenja. Prva grupa je obišla Muzej Nikole Tesle, u kojem smo upoznati o njegovom životu i postignućima. Također, imali smo priliku vidjeti i učestvovati u eksperimentima. Druga grupa je obišla Muzej Ive Andrića koji je zapravo njegov stan u kojem je od 1958. živio sa suprugom Milicom Babić. Vidjeli smo knjige i časopise, fotografije, dokumente te lične predmete dobitnika Nobelove nagrade za književnost.



U večernjim satima krstarili smo Savom i Dunavom, pa smo imali priliku vidjeti grad i iz te perspektive.

U ponedjeljak ujutru zaputili smo se u Muzej vazduhoplovstva u kojem smo bili fascinirani avionima, helikopterima, jedrilicama, radarima, raketama, simulatorima za obuku. Nekada je bio Muzej



jugoslovenskog vazduhoplovstva, a od 1989. godine je u novoj zgradi, pored aerodroma.

Učenici su se vratili i više nego zadovoljni Beogradom i planom i programom posjete.

Nakon toga smo krenuli u memorijalni kompleks "Kuća cvijeca" i posjetili spomen-grob bivšeg jugoslavenskog predsjednika Josipa Broza Tita i njegove supruge Jovanke. Uživali smo u interijeru i prezentiranju Titovog života. Zanimala nas je i predivna bašta kompleksa.

Zahvaljujemo profesorima Erni Mujić, Selmi Mešić, Edini Lokvančić, Almi Gibović, Abidu Zukiću, Elmi Mašnić-Šikalo, Melihi Salihović, te zamjenici direktorice Amri Čolić, koji su bili uz nas sve vrijeme i koji su, nadamo se, bili zadovoljni nama, koliko i mi njima.

Amila Gabela, III₅
Foto: Tajra Osmanagić, III₅



Posjeta učenika Danskoj

Učenici IV₃ sa profesoricom Sanidom Nuhanović pripremali su se na put u Dansku.

Jarebica Hannan, Muharemović Džejna, Džaferović Lamija, Abaza Mirza, Karabeg Rej i Imamović Mirza, u pratnji profesora sporta Adema Bajrića, uputili su se 4. septembra 2018. u ovu avanturu.

Nakon ne toliko dugog leta avionom stigli smo u Aarhus. Domaćini su nas dočekali osmijehom, radovali smo se upoznavanju novih porodica i jedva čekali da se smjestimo u domove. Sutradan smo obišli školu

i Gradsku vijećnicu. Imali smo priliku upoznati ministra, uređenje Danske te grada. Prisustvovali smo nastavi. Priznali su nam da je opušten odnos sa profesorima ono što im mnogo pomaže u školovanju i da se zbog toga mnogo slobodnije osjećaju. Jedino nastavno sredstvo kojima se danski učenici koriste je moderni laptop. Obilazak muzeja bio je jedan od zanimljivijih segmenata ove razmjene. Svi muzeji su interaktivnog tipa. S obzirom na to da smo društvenjaci, uspjeli smo pokazati znanje o historiji, ali isto tako i obogatiti ga. Saznali smo mnogo toga i o životu Danaca. Veoma su sportski aktivni bez obzira na uzrast. Bicikliranje je dio njihove svakodnevnice. Zbog toga što su ekološki osviješteni, izbjegavaju korištenje automobila. Vole zdravo se hraniti. Uz užinu obavezno nose i voće. Uživaju u druženjima, zabavi, provodima.

Ovaj projekt bio je jedno novo, ali veoma značajno iskustvo koje ćemo, zasigurno, dugo pamtiti.

Lamija Džaferović, IV₃





Studijska posjeta maturanata



Maturanti Treće gimnazije su od 4. do 10. oktobra 2018. realizirali studijsku posjetu: Beč – Prag – Budweis – Dresden – Leipzig – Budimpešta.

Učenici IV₁ (jezičko područje) te 23 maturanta drugih odjeljenja DSD-ovaca, u pratnji direktorice Senade Salihović i profesorica Šejle Brkić-Delalić i Edine Hodžić, uputili su se na ovo nezaboravno putovanje.

Nakon duge noćne vožnje autobusom stigli smo u Beč u prijednevnom satima. Poslije smještanja u hostel, predvođeni vodičima, zaputili smo se u zajednički obilazak grada. Posjetili smo atrakcije našeg prvog odredišta: Heldenplatz, Rathaus, Hofburg, Stefansdom, veličanstveni Schloss Schönbrunn. Slobodno vrijeme iskoristili smo za odmor u zapanjujućem parku Burggarten. Ljubitelji adrenalina uživali su u bogatom sadržaju zabavnog parka Prater, a osjetili smo i dašak atmosfere Oktoberfesta.

Drugi dan u Beču bio je rezervisan za posjetu muzejima. Neki od zanimljivijih su: Muzej čokolade, Muzej torture, Albertina, Leopold, Tehnički muzej, Planetarij... Grupa učenika gledala je pozorišnu predstavu na njemačkom jeziku, uz koju se odmorila od cjelodnevnog obilaska grada.



U Prag smo stigli 7. oktobra te obišli jednu četvrt osjetivši atmosferu zlatnog grada okupanog svježom jutarnjom rosom. U restoranu „Lukalu“ svjedočili smo drugačijem načinu života Bosanaca i Hercegovaca koji su ovdje pokrenuli privatni posao. Uživali smo u pogledu na svjetski poznate likovne umjetnine. Bio je ugošćen i bivši učenik Nikola Trivković, koji studira u Pragu, pa nam je predstavio grad i iz odgojno-obrazovne perspektive. U Muzeju Franza Kafke proširili smo znanje o pročitanoj djelu „Proces“. Arnela Obralija, Lamija Džaferović i Zerina Osmić nakratko su preuzele ulogu vodiča te pričale o Astronomskom satu, Karlovom mostu, Praškom dvorcu odlično obavivši zadatak.

Sutradan smo posjetili České Budějovice, a razlog tome je ranije dogovorena saradnja sa privatnom školom „Češko-anglické gymnázium“. Sa učenicima ove ustanove obišli smo grad. Druženje je nastavljeno u učionicama gdje su naši gimnazijalci pokazali znanje i vještine na engleskom i njemačkom jeziku.



U Dresdenu, glavnom gradu pokrajine Saske, privrednom i kulturnom centru na istoku Njemačke, obišli smo brojne znamenitosti: Semperoper (najakustičnija zgrada opere na svijetu), Zwinger (srednjovjekovni barokni dvorac), Hofkirche, Neumarks, Bruhl's Terrace (sa koje se pruža veličanstven pogled na rijeku Labu i mjesto nastanka predivnih zajedničkih fotografija)...



U Leipzig, rodni grad kompozitora Bacha, stigli smo u vrijeme svečanosti obilježavanja 29. godišnjice prvih mirovnih protesta, a koji su prethodili padu Berlinskog zida. Zajedno sa hiljadama građana zapalili smo svijeću koja simbolizira mir i položili je na glavni trg. Tokom prethodne školske godine u Trećoj je boravila volonterka iz ovoga grada Lisa Cerni. Velikodušno nam je pomagala u savladavanju njemačkog jezika, ali bila i odličan prijatelj u vannastavnim aktivnostima. U znak zahvalnosti, sastali smo se sa njom i uručili joj poklon te se zajedno uputili u obilazak Crkve svetog Tome (Thomaskirche), stare i nove zgrade gradske vijećnice te Univerziteta.



Većina nas je u Budimpešti probala čuveni paprikaš koji nam je dobrodošao budući da je "na kašiku". Posjetili smo znamenitosti: Budimski dvorac, Ribarsku tvrđavu na Budimu, Crkvu svetog Matijaša, Lančani most i Vaci ulicu.



Ova studijska posjeta obogatila nas je brojnim saznanjima. Naravno, kao i svi srednjoškolci, stekli smo zajedničke uspomene i priče koje ćemo cijeli život pamtili. Možemo reći da je ovo bila naša druga ekurzija, naše drugo najljepše i nezaboravno srednjoškolsko iskustvo. Ponosni smo i zahvalni školi i roditeljima koji su nam omogućili još jednu suzu radosnice u oku zamišljenih tridesetogodišnjaka 2030. godine.

*Abela Rastoder, IV₂
Arnela Obralija, IV₂*



Posjete pozorištima

U prvom polugodištu školske 2018/19. učenici naše škole, u pratnji profesora, pogledali su brojne pozorišne predstave.

S profesoricom Amilom Huseinbašić 24. septembra 2018. u Kamernom teatru 55 gledali su predstavu "Zatvorenica", koja progovora o položaju usamljene žene u društvu pod teretom lošeg odnosa sa supružnikom, a režirala ju je glumica Sedžida Šetić.



Učenici prvih i četvrtih razreda s razrednicima 8. oktobra 2018. u Narodnom pozorištu pogledali su "Fistik" i nasmijali se predstavi u režiji Admira Glamočaka.



Učenici trećih razreda su sa profesorima Almom Gibović, Džemaludinom Poturovićem i Ernom Mujić 18. oktobra 2018. otišli u posjetu Kamernom teatru 55. Učenike i profesore je u večernjim satima oraspoložila predstava "Teferič", tačnije satira o vlasti u režiji Aleša Kurta.



Članovi Novinarske sekcije i I₁, u pratnji profesorice Dženane Nezirević, u Kamernom teatru 55 4. decembra 2018. gledali su predstavu "Tri sestre" A.P. Čehova, u režiji Pjera Žalice. Svi prisutni su veoma uživali u nastupu Tatjane Šojić, Maje Izetbegović i Gordane Boban u glavnim ulogama.



Iste večeri učenici III₁, III₂, III₃, III₃, III₄ i I₅ sa profesoricama Edinom Lokvančić, Elmom Mašnić-Šikalo, Almom Gibović, Melihom Salihović i Melisom Tvrtković prisustvovali su pretpremijeri opere "Seviljski berberin" u Narodnom pozorištu.

Naredne sedmice istu predstavu su pogledali učenici IV₁ i IV₂ s profesoricom Senadom Turajlić.

U posjeti Sarajevskom ratnom teatru 5. decembra 2018. bili su učenici IV₃ i IV₆, s profesoricom Dženanom Nezirević pogledali su predstavu Majstor i Margarita, urađenu prema istoimenom romanu Mihaila Afanasjeviča Bulgakova, a u režiji Aleša Kurta.

S profesoricom Amilom Huseinbašić naši učenici su 17. decembra 2018. uživali u predstavi "Mirna Bosna" u Kamernom teatru 55. Glumci Feđa Štukan, Davor Golubović, Gordana Boban i Vanesa Glođo zadivili su nas i doveli do suza.



Učenici I₁, I₂ i I₃, u pratnji direktorice Senade Salihović i razrednika Dženane Nezirević, Džemaludina Poturovića i Melise Tvrtković, pogledali su predstavu "Bosanski lonac" 25. decembra 2018. u Centru kulture i mladih Općine Centar. Prisustvovali smo premijeri obnovljene predstave nastale prema motivima teksta "Prognanici" Hasana Džafića.



U Art kući sevdaha

Nakon uspješne obrade naše narodne lirske pjesme sevdalinke na časovima Bosanskog jezika i književnosti učenici I₅ i I₆ posjetili su Art kuću sevdaha 18. oktobra 2018. sa profesoricom Amilom Huseinbašić. Veoma gostoljubivo smo dočekani. Predavanje nam je održao Almir Stefanović, koji nam je na šaljiv i zanimljiv način pokazao Kuću sevdaha, govorio o našoj tradiciji i kulturi i o najpoznatijim izvođačima sevdalinke. Nakon toga smo počašćeni kolačima i sokom, a svi smo postali članovi Art kuće sevdaha.

Merima Glušac, I₅



Posjeta Muzeju "Alija Izetbegović"

Povodom obilježavanja 15. godišnjice smrti prvog predsjednika nezavisne BiH Alije Izetbegovića, učenici društvenog područja III₃ su sa profesoricom historije Sanidom Nuhanović posjetili Muzej "Alija Izetbegović", učestvovali u interaktivnim radionicama, uz prigodan čas historije.



U Muzeju Jevreja

Učenci I₁, I₄, I₆, sa profesorom Esadom Karahodžićem, posjetili su 21. novembra 2018. godine Muzej Jevreja u Sarajevu. Nazivaju ga i Veliki hram, izgrađen je 1581. godine i, prema mišljenju mnogobrojnih stručnjaka, predstavlja jedan od najljepših izložbenih prostora. Muzej je na Baščaršiji, smješten je u Starom hramu, a otvoren je 1966. godine u znak sjećanja na dolazak Jevreja na tlo BiH. Proširili smo znanja o judaizmu, historiji jevrejskog naroda, običajima, praznicima, ali i njihovom stradanju tokom Drugog svjetskog rata.



Posjetili smo Aškenašku sinagogu

S profesorom Esadom Karahodžićem učenici prvih, drugih i trećih razreda posjetili su Aškenašku sinagogu. Čuli smo nešto više o ovom objektu izgrađenom 1902. godine i jevrejskoj zajednici. U Bosni i Hercegovini danas živi oko 1.000 pripadnika te zajednice, od kojih je oko 700 u Sarajevu.

Helena Bogdanović, II₅



Sarajevo digital marketing

Adna Salković, Amna Vladavić, Adisa Čengić, Arnela Obralija, Ervin Golubović, Eldar Panjeta, Amar Čelo i Demir Muratović prisustvovali su seminaru 10. novembra 2018. u hotelu "Hollywood" gdje smo imali priliku upoznati mnoge studente ekonomije u Sarajevu koji su nama, maturantima, proširili vidike po pitanju studija na istoimenom fakultetu.

Seminar je otvorio Kemal H. Balihodžić temom "Budite game changer - poduzetništvo i uspjeh". Predavao je o poduzimanju sudbonosnog koraka kako bismo pomjerali granice i preuzeli potreban rizik koji nas dovodi do željenog cilja. Naredni izlagač Dragan Grubački naučio nas je kako biti prvi na Google pretrazi i kolika je važnost prelaska na https. Zadnji izlagač prvog dijela bio je Miroslav Varga koji je ukazao na važnost ljudskog zdravog razuma tokom korištenja digitalnih uređaja. U drugom dijelu predstavio se Miloš Vasić koji je podučavao o takozvanom dropšippingu i zašto je baš on postao najpopularniji onlajn biznis-model. Nakon njega je uslijedio Miloš Đekić i objasnio kako efektivno sačuvati budžet i postići maksimalne rezultate reklamiranja onlajn. I Nedim Šabić nas je oduševio pričom "Kojim sadržajem oduševiti i Google i njegove korisnike?".

Mnogo toga smo naučili o digitalnom svijetu u kojem živimo i njegovom napretku i razvoju.

Arnela Obralija, IV₂



Posjeta predavanju CERN-a u Likovnoj akademiji

Učenici naše škole prisustvovali su predavanju prof. Ivica Puljka, hrvatskog fizičara, u Likovnoj akademiji 18. oktobra 2018. godine. Na Akademiji smo slušali predavanje o nastanku svemira, uživali u izložbi koja predstavlja spoj nauke i umjetnosti te naučili nešto novo o istraživanjima CERN-a, međunarodne institucije za nuklearna istraživanja.

Profesor Puljak pričao nam je o nauci, umjetnosti, tehnologiji i budućnosti. "Ne dajte da vas plaše, pogotovo budućnošću, jer će budućnost biti onakva kakvom je mi izgradimo. Vrlo vjerovatno će biti sve bolja i bolja, a to će ovisiti o vama", rekao je.

Emma Selimović, II₅
Foto: Hana Salom, II₅



ETOS inicijativa

U Hotelu Hills na Ilidži 29. oktobra 2018. godine održana je konferencija u organizaciji TPO Fondacije koja je obilježila pet godina promocije programa ETOS inicijative. Na konferenciji se govorilo o fenomenima koji danas nisu, a trebali bi biti, u fokusu ljudske pažnje kao što su: etičnost, tolerancija, otvorenost i solidarnost ali i drugim vrijednostima koje ljudi posjeduju.

Sudjelovalo je više od 250 učesnika iz oblasti obrazovanja (svi obrazovni nivoi), zatim struktura vlasti koje su u vezi sa ovom oblasti (ministarstva i pedagoški zavodi) te civilnog društva. Prezentirani su rezultati sjajne ETOS inicijative koja je u prethodnih pet godina okupila više od 1.000 nastavnika iz BiH. U radu konferencije sudjelovale su: Senada Salihović, direktorica Treće gimnazije, te profesorice Ismeta Trepalovac i Sedžida Hadžić kojoj je dodijeljena posebna zahvalnica za doprinos u promociji univerzalnih ljudskih vrijednosti u BiH.

U okviru programa konferencije održana je promocija knjige "Živi vrijednosti: globalni etos u lokalnom kontekstu BiH" urednica Zilke Spahić-Šiljak i Melike Šahinović. Podršku konferenciji svojim volonterskim radom dali su naši maturanti: Anela Coković, Bakir Haljevac, Ivan Bošković te Hena Hadžić. Za svoj doprinos radu konferencije učenici su od organizatora TPO Fondacije dobili posebne zahvalnice.



Evropski parlament mladih (European Youth Parliament)

Evropski parlament mladih je nevladina organizacija koja ima nacionalne urede u 39 država Evrope. Baziran je na principu modeliranja rada Evropskog parlamenta, legislative body of EU koji je podijeljen na komitete i smišlja rezolucije za probleme s kojima se EU suočava.

U BiH ima pet regionalnih ureda: Sarajevo, Mostar, Banja Luka, Zenica, Tuzla i Bihać. Svaki ured ima regionalnog koordinatora koji nadgleda organizaciju događaja. Postoje dvije glavne grupe manifestacija u Bosni: "Understanding Europe" i "Engage Europe".

"Understanding Europe" sačinjavaju radionice i/ili prezentacije koje se fokusiraju na podučavanje mladih o tome kako funkcionise Evropska unija, njene kompetencije itd. Traju nekoliko sati i obično imaju 10-20 učesnika.

"Engage Europe" čine regionalni forumi i nacionalne sesije. Regionalni forumi su na nivou grada i traju tri dana za delegate (Teambuilding, Committee work i General assembly), a četiri za zvaničnike (dodatni dan za trening). Nacionalne sesije su na nivou države i traju 4-5 dana za delegate i 5-6 za zvaničnike. Internacionalne sesije se održavaju na nivou Evrope. Uspješno napisane rezolucije na internacionalnim sesijama se šalju u Evropski parlament na razmatranje.

Forum ne samo što dižu svijest o socijalnim, ekonomskim, političkim problemima Bosne, Balkana i Evrope već uz to pružaju mladima priliku da izraze svoje mišljenje kao i da obogate znanje o obrađenim temama. Najčešće ima 7-9 komiteta po forumu. Na svakom događaju je moguće upoznati mnoštvo ljudi, ostvariti dugoročna prijateljstva i unaprijediti znanje engleskog jezika.

Osim za delegate može se aplicirati za reportera foruma – fotografisati, snimati zabavne videoreportaže i generalno medijski pokrivati forum. Mnogi učenici Treće gimnazije su upoznati o radu Evropskog parlamenta mladih, a mnogi od njih su aktivni u toj organizaciji učestvujući na regionalnim sesijama ne samo kao delegati već kao i zvaničnici. Na četvrtoj nacionalnoj sesiji u BiH su učestvovali: Mak Hasanović, Nora Markanović, Ajdin Polić, Selma Zukić i bivša učenica Ana Sužnjević, te nakon toga dobili priliku da prisustvuju kao delegati na internacionalnim sesijama. Nora Markanović je bila delegatkinja na IS Rotterdam, a Ajdin Polić na IS Vilnius. Uz to, vrijedi spomenuti i našeg bivšeg učenika Ademira Beširovića, koji je za osam mjeseci napredovao od pozicije delegata do pozicije potpredsjednika sesije. Sljedeća nacionalna sesija u BiH će se održati krajem februara ove godine. Naši vrijedni učenici su uspjeli osigurati mjesto tako što su na regionalnim sesijama bili na listi top 10 delegata, a neki od njih su: Ivan Bošković, Anela Coković, Bakir Haljevac, Mak Hasanović, Nora Markanović, Gabriel Nikitović, Lamija Omerović, Lamija Šahinović i Dina Zonić.

Anela Coković, IV,



Dani Matice hrvatske - Posebno priznanje



Učenici naše škole su se i ove godine odazvali pozivu za učestvovanje na konkursu Matice hrvatske za izbor proznih i poetskih radova sarajevskih srednjoškolaca. Na konkurs raspisan u oktobru literarne radove poslali su: Abela Rastoder, Ema Selimović, Tvrtko-Jasmin Dželilović, Dina Kurtalić i Katarina Šanje. Posebno priznanje Matice hrvatske dodijeljeno je Abeli Rastoder, učenici IV₂. Uz priznanje, dodijeljena joj je i novčana nagrada. Sastavi naših učenika su tim povodom objavljeni u Zborniku proznih i poetskih radova sarajevskih srednjoškolaca. Želimo da ova nagrada bude podstrek svim učenicima Treće gimnazije u pisanju literarnih radova.

Abela Rastoder, IV₂

“...sve je to izašlo iz moje šalice čaja” (M. Prust: “Šolja čaja”)

Iscrpljujući pogled na hladnoću ovozemaljske trke zahtijeva sklapanje teških kapaka i potragu za ulaznicom u svijet dimenzijama bezgraničan i skladnošću uzvišen. U šarenoj kutiji sopstvenog univerzuma i pjev ptice koji prelazi u muk, jednolično kuckanje na kućna vrata ili škripanje ljuljačke u hladu drveta oživljava odveć okamenjene slike.

Iako svaki period života ima svoju čar, sjećanja na osunčane dane djetinjstva uvjetuju podrhtavanje tijela i razvlačenje usana u blagi smiješak. Svaki novi previraj u mislima iziskuje stapanje razdraganih boja u novonastali mirniji kolaž. Odbacivši uniformu djevojčice zarobljene u tijelu odrasle žene, često poželim postati zatočenikom prošlosti čije maglovite obrise neuspješno pokušavam obuhvatiti. Idealizirana predodžba života kao bajke u kojoj nestaju granice između stvarnog i imaginarnog, koja prihvata nježnost ružinih pupoljaka zanemarujući njezino trnje i gramzivo korijenje, sve više izmiče iz vidokruga. Sjedeći u dvorištu na zahrđalaj ljuljački sa knjigom u rukama, sjetim se mirisa požutjelih stranica svake prethodne. Osjećam kako me bodu one ježeve iglice iz Čopićevih pjesama, a onda vidim Minu, zaštitnicu “Ruže” kako svaki dobiveni cvijet sa pažnjom smiješta u sobu, sve tješnju usljed punoće ustreptalih emocija. Strujanje vjetra sjeti me na dane kada bih postajala glavnom junakinjom Nurinog romana, neumorno čekajući svoga Tahira. Ponovo uvidim da hodam na rubu duž prekinutih djetinjih snova i ulaska u svijet odraslih koji u hladnom ormaru života čekaju da prigrle tamni kaput namijenjen njihovim godinama. Razdraganom lepetu leptirovih krila suprotstavi se zaokupljenost osvajanja svakodnevnice, uznemirenost usljed suočavanja sa nekim problemom. Iako, naizgled, mali, u poređenju sa nedostižnom skupom lutkom na izlogu ili povrijeđenim koljenima, postaje enorman te hipohondrično traži da bude shvaćen.

Naglo škripanje ljuljačke uvijek iziskuje onaj ponovni iscrpljujući pogled i udaljavanje od šarene kutije univerzuma. Maštanja bivaju potisnuta sve do početka čitanja sljedeće knjige čija svaka nova stranica “izlazi iz moje šalice čaja”.

Abela Rastoder, IV₂

Dok čekamo bolju budućnost, ne smijemo zaboraviti da je naša i sadašnjost

Zanimljiva je činjenica koliko vremena ljudi provode maštajući o budućnosti. Gdje ćemo živjeti, s kim ćemo živjeti, kako ćemo živjeti; pitanja koja postavljamo sebi svaki dan, misleći da će nam odgovor jednom nadoći. Surova istina jeste da odgovore na ta pitanja nikad ne možemo dobiti, jer budućnost je nešto ka čemu uvijek težimo, ali naše želje u vezi s njom rijetko kad budu ispunjene na način na koji smo očekivali. Jedan ogroman detalj na koji svi zaboravljamo je sljedeći: Da li ću se sutra probuditi? U jednom trenutku smo tu, u sljedećem nas nema, tako svijet funkcionira. Vrijeme je zanimljiva enigma na ovom svijetu. Vrijeme niko ne vidi, niko ne može opipati, ali je jedini pokazatelj da sve i svako, od građevina do ljudi, na kraju postane još jedan dokaz prolaznosti. Ako već tako funkcionira, zašto se onda uopće zamarati s građenjem budućnosti koju čak i ljudi sa najvećim preduvjetima ne ostvare? Zašto se truditi oko nečega što će vjerovatno biti nebitno? Moj odgovor na to glasi da je život definisan trenucima. Ljudi često imaju unaprijed stvoren pojam toga kako bi njihov život trebao izgledati, ne znajući da život, kao i sve u prirodi, uvijek se mijenja. Život je na taj način isprepleten trenucima sreće, boli, radosti, mržnje, ljubavi, zavisti, koji traju neodređeno vrijeme i onda se promijene. Ništa ne traje vječno, a nama je to teško prihvatiti, a još teže pustiti. Sadašnjost u kojoj živimo je okrutna, najblaže rečeno. U okeanima se nalazi više plastike nego morskih životinja, diktatori vode države, ratovi izbijaju svugdje kao korov, a mi stojimo i nadamo se nekoj budućnosti gdje je sve to riješeno za nas. Budućnost zasnovana samo na lošim temeljima prošlosti i bez podrške u pogledu sadašnjosti, urušit će se sama od sebe. Mi smo arhitekti te budućnosti, ali jedinu budućnost koju gradimo je virtuelna. Čitavo postojanje nam se svelo na objavljivanje slika na Instagramu i dijeljenje linkova po Facebooku, dok svijet oko nas gori. Recite mi, da li po društvenim mrežama objavljujemo naše ružne slike? Slike na kojima se vidi da smo depresivni i tužni i samo hoćemo da nestanemo na nekoliko sati? Ne. Jer to znači prikazati svoju ranjivost. Objavljujemo videe sa koncerata i slike sa plaže kako se brčkamo u vodi, ali da li uopće doživljavamo te trenutke? Slušamo muziku, a i ona je odavno prestala izazivati emocije bilo kakve vrste u mnogim ljudima, trčimo za luksuzom i novcem, tim "grandioznim životom", koji rijetko koga čini zadovoljnim. Pokoravamo se društvenim standardima kao da nam život od toga zavisi, jer mišljenje koje je iole drugačije od većine je pogrešno, iako nam upravo u većini slučajeva takva mišljenja trebaju. Tišina i neznanje su najveći neprijatelji ljudskom rodu. Bojimo se nepoznatog, a ne trudimo se da naučimo nešto o tome. Dičimo se time kako smo najumnija bića na planeti, no ponašamo se kao divlje životinje. Što vrijeme više odmiče, što se više približavamo toj "boljoj budućnosti", mi kao da nazadujemo. Ne napadamo više ljude sjekirama i mačevima, niti ih palimo na lomači, ali smo se naoružali gorim oružjima. Sebičnost, egoizam, licemjerstvo, čine naš novi arsenal koji uništava ne samo našu budućnost, ali degradira našu sadašnjost. Našu prošlost, već toliko punu nasilja i grešaka, samo potvrđuju naši postupci danas, samo što smo prije imali obraza da napadamo neprijatelje direktno u lice, dok sad zabijamo noževe u leđa. Toliko smo obuzeti glupostima da ne vidimo veću sliku. Ograničili smo se na tu ideju „bolje budućnosti“ koja može ali i ne mora da se desi. U toj potrazi za nečim boljim i u strahu od toga da pustimo nešto staro, propuštamo ono što se nalazi ispred nas. Život je fascinantno po tome što je istovremeno tako dug, a tako kratak. Agoniju i tegobe doživljavamo tako dugo i sporo, ali se isplati kada dođe onaj trenutak u kojem nas prekrije val radosti. Taj osjećaj ne mogu drugačije opisati nego kao osjećaj zadovoljstva koji pjesnik osjeti kada napokon završi pjesmu koja mu se toliko dugo motala po glavi ili, možda, kad fizičar riješi zadatak iz statike koji nikako nije mogao dokučiti danima. I da, često je život nepošten i okrutan, ali ne bi to bio život kada ne bismo doživjeli nepravdu i naučili se s njom nositi. U tome je čitava poenta. Niko ne može sve znati niti sve naučiti, ali svako može pokušati biti najbolja verzija sebe koja može biti. Da bismo to postigli, moramo naučiti šta je bitno. Moramo naučiti da se mijenjamo. Moramo naučiti da slušamo ljude, ne zato da bismo im odgovorili, već da bismo ih bolje razumjeli. Moramo naučiti da se nećemo svakome svidjeti i da je to uredu. Biti drugačiji, imati svoje mišljenje koje, ujedno, nikad nećemo nametati drugome, znači živjeti život onako kako bi se trebao živjeti. Promjene ne moraju biti velike da bismo tu bolju budućnost dostigli. Ali počinje od svakog od nas. Mi ljudi nismo stvoreni da živimo sami, jer ako jedno od nas se osvijesti, šanse su ogromne da će i drugi polako se početi buditi. Krenimo od nas samih. Bacimo praznu flašu u kantu umjesto na ulicu. Glasajmo za najboljeg na izborima. Protestujmo protiv ratova ili donirajmo hranu i odjeću, jer niko ne zaslužuje da pogine zbog prepucavanja oko vlasti i bilo kakva vrsta pomoći je dobrodošla. Umjesto da slikamo zalazak sunca, trebamo spustiti mobilni i posmatrati taj zalazak. Otići sjesti negdje na neku klupu na nekom šetalištu i pročitati knjigu. Ptice često znaju biti lijepa pozadinska muzika dok se upuštamo u imaginarni svijet koji je autor u našim rukama izmislio. Uzeti gitaru u ruke, nema veze što neki od nas ne znaju svirati. Pokušati nešto novo i pogriješiti pa onda krenuti ispočetka. Riskirati i dopustiti sebi da iskusimo sve što možemo iskusiti dok se nalazimo na ovoj planeti. Učiti i širiti znanje, jer time se gradimo. Ako je neko od nas sam, ne treba brinuti zbog toga. Dovoljni smo sami sebi, a ljudi uvijek ima na pretek koji će doći u naš život. Da, puno je tragedije na ovom svijetu, ali između udaraca munje, građene od straha koji nas koči, od zemlje pune propalih pokušaja, dok iz nebesa pada kiša sumnje, primijetiti ćemo kako nas na djelić sekunde obasja zrakom sreće i radosti, sačinjena od našeg smijeha i zadovoljstva. Sadašnjost je naša ako je želimo prihvatiti našom, cijeliti i dobro i loše trenutke koje donese, ali i raditi na tome da ono što je loše popravimo, a ono što je dobro učinimo još boljim. Da naše maštanje ne bude samo puki neostvareni san, već iskra koja će započeti plamen u nama, a kasnije se rasplamsati u ambicije koje će nas voditi i ispunjavati čitav život. Ciljevi, nebitno da li su ostvareni ili nisu, svezremenski su i čine temelj nas i naših predaka. Budućnost – to smo mi i novi naraštaji. A ako smo sebe izgradili da budemo dobri, da budemo avangardni, da smo otvoreni prema svakoj vrsti razmišljanja koje će poboljšati naše živote, zar to onda ne znači da budućnost koja dođe, kakva god da dođe, bit će dobra? Vjerujem da u ljudima i dalje ima dovoljno dobra da se to može desiti. Ali sjetimo se, dok gradimo sebe, dok čekamo da ta budućnost postane nova sadašnjost, da uživamo u već postojećim sitnicama i trenucima koji kada se spletu zajedno, čine srž naših života i samih nas. Sjetimo se da nije poenta živjeti i čekati nešto vječno, već živjeti i uživati u onome što je već pred nama, a stvarati uvjete za nešto neizmjereno bolje...

Iman Bostandžić, III,

A sve ovo bit će jučer...

Sat kuca.
 Često sam tužna. Sutra.
 Opet neću spavati. Ne mogu više!
 Zašto? Kamo?
 Suza u oku, suza na prozoru.
 Ruke mi drhte.

Moje suze krvave zbog odlaska,
 iz ovog trenutka, zbog ovog dana.
 Jer, prošlo je vrijeme u kojem smo trebali biti.

Povedi me za ruku,
 primi me visoko,
 kao suzu utonulu
 u sjećanje.

Nema ljubavi.
 Ne, ona se skriva. Možda.
 Dileme.
 Povlačim se u sebe. Okovana.

Dugo u noći
 provodim sate
 strahujući.
 Ja ću pokušati
 otrgnuti tmurna jutra,
 pokušati sanjati bolje sutra.

Suze gorke, težinom
 postojeći sat ubile.
 Osjećam.

Suze nema. Uzdah.
 Umorna sam! Živjeti?
 Nepovezane misli.
 U srcu sjeta.
 U gradu svjetlost.
 U duši nestalo struje.
 Boli...
 Zvoni.

Katarina Šanje, III₆

San

Slušao sam zvuk tišine kojeg nije bilo
 i u svjetlosti noći što je nije bilo,
 osjetio spokoj i mir.
 Uvučen u njih kao u vir,
 shvatio sam koliki je dar samoća-
 njom sam proklet dok očima gledam.
 U životu što nikog ne štedi,
 već udarcima teškim, zamasima dugim
 tjera da cijeniš ono malo što vrijedi.
 Neko malo zrno utjehe nalazim
 u tami noćnoj što odlazi i dolazi,
 u lakom plesu sjenki se snalazim.
 I dok me noć u svoja njedra uzima
 zaboravljam koliko je teško drugima.
 Lebdim u spokoju između svjetova
 I svaki put kad zaklopim umorne oči
 odlazim u neki novi svijet što kratko traje.
 Svijet što slama karike vremena,
 u kojem nema životnog bremena.
 Ali kratko traje moj put kroz tvorevine uma,
 svaku noć ponovo kraj je drumu.
 I utonem, nazad, u neki novi san
 običan i siv, stvarnost zvan
 i čekam opet dar samoće u noći,
 za stvarni dan moram snage smoći.

Tvrko-Jasmin Dželilović, III₆

Je li Sarajevo gdje je nekad bilo?

Šta to čini jedan grad? Kako odgovoriti na pitanje: Šta je naš rodni grad, šta je naše Sarajevo? Svako ko pročita ovo pitanje, imat će drukčiji odgovor, jer svoj rodni grad svako drugačije posmatra. Pa kako onda objasniti gdje je Sarajevo? Je li to samo još jedan grad u kotlini između planina, ili je, pak, to duh koji živi u svima nama?

Odrasla sam slušajući svoje roditelje kako govore o Sarajevu kakvog pamte iz djetinjstva. Nije se mnogo u njegovom izgledu promijenilo. A opet, kažu, nije Sarajevo ono što je nekad bilo. Ljudi čine grad. Oni su ga izgradili i nastanili, i oni će ga uništiti. Nisu Sarajlije što se nekad bile, ili su samo prije dobro krile ono što zapravo jesu. Famosni broj tri, koji nam je na rođenju podmetnut, prati nas cijeli život. Sve se može naći u neke tri, uglavnom ne mnogo različite, verzije. Neka, mislila sam, neka nas ima i tri naroda, i tri jezika i sve neka bude po tri, samo da ne bude rata i mržnje. Sada vidim koliko sam grijeshila zavaravajući sebe da prošlost možemo ostaviti u prošlosti. Ne možemo. Nije to u našoj prirodi. Djeca ne žele da žive u prošlosti koje se ni ne sjećaju, koju su uništili njihovi roditelji i djedovi, ali oni vole da je vraćaju. Sarajevo je kao gnijezdo, ograđeno planinama, malo, lijepo i koliko-toliko sigurno. Ali uništije nam nečiji preci gnijezdo, svojom mržnjom i svojim ratovima. Kao da su rekli: "Ti, ptice, ili popravljaj našu štetu, ili novom gnijezdu leti." I odletješe. Sarajevo nije Sarajevo bez Sarajlija, a oni lete po svijetu, tražeći neko novo gnijezdo. Neki ga nađu, pa ostanu, neki lete mnogo više od drugih, a neki se i vrate u rodni grad. I gdje god odletjeli, Sarajevo nose u srcu. Putuje rodni grad sa hiljadama Sarajlija, po mnogo različitih gradova i država. Govorim iz iskustva kada kažem da ne odlaze samo zbog siromaštva. Odlazimo zbog sebe, odlazimo jer ne želimo da naša djeca odrastaju u svijetu punom mržnje u kojem smo mi prisiljeni odrastati. Grad je i sve ono što ljudi nose sa sobom, naša tradicija, naglasak i ona prava bosanska kuhinja, koja svima najviše nedostaje. Baš ta se tradicija sa ljudima širi po čitavom svijetu. Istina, poznati smo po mnogo čemu, ali možemo biti ponosni što nas svijet počinje prepoznavati i po lijepim, pravim bosanskim stvarima.

Sarajevo je i dalje dijete u svojoj kolijevci omeđenoj planinama, kao i svaki grad stoji i ne miče se. Međutim, sarajevski duh, ono što ga čini gradom a ne samo praznim kosturom od zgrada i kuća, pomjera se sve više sa Sarajlijama. Obišao je pola svijeta, ide svugdje i ostaje u srcu onih koji mu to dozvoljavaju. Jeste, Sarajevo je baš ondje gdje je uvijek i bilo. U našim srcima, gdje god mi bili. I nosit ćemo ga još dugo, u još više gradova i država dok, kao i svaka ptica, letimo u potrazi za većim gnijezdom.

Ena Selimović, II₅

Voda vrijedi da se štedi

11.8.2109. I ovo jutro me probudila žeđ. Polutama u sobi, sunce tek stidljivo proviruje iza oblaka i kuca mi na prozore - budi me. Sviće. A ja, malaksala svaki dan sve više, kao da tonem. Nisam jedina, na trenutak mi se čini da se cijeli svijet gasi. Planeta podsjeća na sivi probušeni balon. Ustala sam lagano, podigla roletne da bi me sunčeve zrake barem malo pomilovale, ali jedino što želim već dugo je samo voda – čistavoda. Nekada sam imala predivan pogled na Miljacku, ali sada je tu samo presušilo korito koje umjesto vode grli samo limenke, staklene razbijene boce i bačene igračke. Kažu da negdje još uvijek teku rijeke, mada ni one više nisu bistre ljepotice već bolesnice u blijedim smeđim haljinama za koje više nema lijeka. Niko im nije ni pokušao pomoći, šta više polako smo ih ubijali svaki dan, kao da nam ne trebaju, kao da ne žudimo za njima. Umjesto pažnje, gađali smo ih otpadom, misleći da će ono otploviti na putovanje u uništenje – ali neće, rijeke su ga čuvalo vjerno – umjesto otpada, na to putovanje su ipak otišle samo rijeke. Vrijeme kao da je stalo, ljudi su iscrpljeni, iscrpljena je i priroda. Poželim da operem ruke, ali pak nemam ni tu sreću, primorani smo koristiti neke druge hemijske preparate kako bismo ostali čisti. A nemam snage, nemam volje. Usne su mi erozivno tlo, ispucale i bez života. Cvijet sam što u tišini vene. Prisjećam se kako smo nekada imali sve, izvor života u svakoj kući, rijeke što žubore, plešu savijajući se u kukovima, zavode sve slučajne prolaznike, pozivaju ih na trku s njima, ali sada je sve to daleko sjećanje. Profesor geografije nam je spominjao da postoje i slapovi, vodopadi što se izdižu jedan nad drugim i zrače životom, što su raj na zemlji, ali nikad nisam stigla vidjeti ih. Nekada je bujao život, sad bujaju samo tvornice. Prisjećam se da su nekad ribe veselo lunjale vodama, a sad je svijet osakaćen i za njih. Potražila bih pomoć, ali od koga? Povikala bih, ali nemam snage. Zaplakala bih, ali ne mogu. I čemu kada znam da su drugi bespomoćni koliko i ja. Pomislim kako bi bilo nezamislivo lijepo da vratim vrijeme unazad, da čuvam vode kao vlastite oči, da ih cijenim i pazim. Pa se kajem, gledam u kakvu agoniju smo se sami doveli, kakav pakao smo sagradili, vidim kako plaćamo dug sa ogromnim kamatama. A hoćemo li ga ikad otplatiti? Ubijajući vodu, ubijali smo sebe - sami sebe.

I ovo jutro probudila me majka. Polutama u sobi, sunce tek stidljivo proviruje iza oblaka i kuca mi na prozore - budi me. Sviće. A ja, nikad sretnija, skačem iz kreveta i podižem roletne. Miljacka mi, puna života i energije, maše i želi dobro jutro. Voda nikada nije bila tako lijepa, tako neodoljiva, nikad potrebnija. Znam da idalje postoje mnogi domovi koji nemaju svoj izvor života, ali imam čak takvu sreću da je ja imam i da je moja domovina, Bosna i Hercegovina, Božijim poklonom obdarena. Bože, voda stvarno vrijedi da se štedi! I šta da pomislim kada ljudi kažu da čuvaju nešto 'kao malo vode na dlanu', da li to onda uopće i čuvaju?

Dina Kurtalić, III₄

Na ljetovanju

Ovog je ljeta otac obećao da ćemo ići na more. Mi, djeca, radovali smo se tome. To bi nam bio prvi put da idemo na ljetovanje.

Moja je majka čistačica, a moj otac... On kaže da je "fasader". Ne znam šta to znači... Ja ga jednostavno zovem majstor. Moj otac, majstor, je gotovo uvijek u isprljanoj radničkoj odori i sa osmijehom na licu. Najljepše je kad dođe s osmijehom. Tad obično donese nekakvu bijelu kovertu.

Istina je da smo moj brat i ja dugo nagovarali oca da nas povede na ljetovanje. Često sam mu govorila: "Sva djeca u mom razredu idu na more, a kad dođe septembar, pričaju učiteljici kako im je bilo. I ja želim pričati učiteljici kako mi je bilo na ljetovanju." Obično je odgovarao šutnjom i ozbiljnim, pomalo tužnim, izrazom na licu, ponekad i uzdahom, ali nikad riječima.

Tako su ljeta odlazila i dolazila. S njihovim je dolaskom rasla želja za morem. S njihovim se odlaskom gubila ta želja. Gubila se u magli zaborava.

Tako je bilo sve dosad. Otac je rekao da ovog ljeta sigurno idemo na ljetovanje.

"Posudit ćemo fotoaparat od komšija i napraviti ćemo mnogo slika", rekla je majka. Još je dodala da će meni i bratu kupiti kupaće kostime, da ćemo učiti da plivamo, da ćemo ponijeti loptu i igrati odbojke na pijesku. Rekla je da ćemo biti sretni...

Brat i ja smo cvjetali od radosti. Napravili smo popis stvari koje ćemo raditi kad odemo na ljetovanje. Sve što budemo radili ćemo uslikati pa slike izraditi i spremiti u album. Kad počne školska godina, ponosno ću reći učiteljici da sam i ja bila na moru. Možda ponesem i koju sliku, kao što to rade ostala djeca.

Međutim, sljedećeg se dana majka vratila s posla tužna. Jasno se vidjelo da nešto nije uredu. Brat i ja smo joj pokazali naš popis i ona kao da je htjela zaplakati. Oči su joj bile suzne. Tužno nas je posmatrala, ne rekavši ni riječ. Došavši kući, otac je obavio razgovor nasamo s majkom, a onda su nas pozvali.

"Slušajte, djeco moja... Ovog ljeta nema mora." Brat je plakao, ali ja nisam! Ja sam bila hrabra!

Majka je počela pričati stotinu puta ispričanu priču o tome kako će sljedećeg ljeta sigurno skupiti dovoljno novca i da ćemo ići na more. Dugo su pričali s nama, a onda je majka pripremila kahvu i nama je bilo vrijeme za spavanje. Dok je moj brat hrkao iz petnih žila, ja nisam mogla zaspati. Išunjala sam se do dnevnog boravka i čula dijelove razgovora (pričali su jako tiho). "Danas sam slabo šta zaradio. Da te bar nisu otpustili", rekao je ozbiljno otac. "Rekli su da im moje usluge više nisu potrebne. A vala, ta se firma i zatvara... Šta im je i trebala čistačica", nastavila je majka. Pričali su strašno tiho, nisam čula sve što su rekli. Vratila sam se u sobu. Brat je bio budan. Počeo mi je pričati: "Znaš li šta sam sanjao? Sanjao sam da smo bili na ljetovanju. Igrali smo odbojke na pijesku, ali je lopta pukla. Zatim smo otišli na more da plivamo. Nadao sam se da ću vidjeti ajkule, ali nisam. Nismo imali aparat da sve to uslikamo, ali je opet bilo lijepo. Kao da sam zaista bio na ljetovanju!"

Majka je ušla u sobu da nas obiđe pa je brat i njoj ispričao svoj čudesni san. Primijetila je da sam htjela plakati. Rekla mi je: "Voljela bih da smo otišli na ljetovanje, ali jednostavno...babo i ja smo u dugovima... Razumiješ me, zar ne?"

"Mama, znaš šta? Meni ustvari i nije toliko bitno to putovanje... Mislim... Nema veze ako nikad ne odemo", rekla sam plačnim glasom, "Važno je da smo sretni i da, da... Želim da ti kažem, ja sam sretna i bez tog glupog putovanja."

Zagrlila me. Sad mi je lice bilo potpuno mokro: "Mama, želim ti reći da te volim."

Esma Turković, I₅

Novinarsko-fotografska sekcija



U posjeti Al Jazeera Balkans



Članovi Novinarsko-fotografske sekcije Treće gimnazije, sa profesoricom Dženanom Nezirević, posjetili su redakciju Al Jazeera Balkans. Tokom ove posjete, u razgovoru sa uposlenima, učenici su mogli mnogo toga saznati o misiji ove medijske kuće, načinu rada i viziji djelovanja.

Melina Kamerić, PR Al Jazeera Balkans, govorila je o načinu rada i svemu onome što danas dobar novinar treba znati.

Tokom obilaska prostorija u kojima se nalazi televizijska redakcija AJB, veb-portal ove kuće, drugi odjeli, od Dokumentarnog programa do Grafičkog, učenici su mogli vidjeti i dva studija kojima raspolaže ova medijska kuća, a koji su opremljeni najboljom i najsavremenijom tehnikom. Al Jazeera Balkans počela je raditi 2011. godine, upošljava novinare iz cijele regije zapadnog Balkana, ima dopisništva u Zagrebu, Beogradu, Skoplju... i više od 250 zaposlenih.

Hana Salom, II₅

LIST IZDAJE NOVINARSKO-FOTOGRAFSKA SEKCIJA

VODITELJICE NOVINARSKO-FOTOGRAFSKE SEKCIJE

Dženana Nezirević i Senada Turajlić,
profesorice Bosanskog jezika i književnosti / Hrvatskog jezika i književnosti / Srpskog jezika i književnosti

GLAVNA I ODGOVORNA UREDNICA

Senada Salihović, direktorica Treće gimnazije

REDAKCIJA

Lamija Imamović, Amel Jašarević, Ajna Đapo, Džejla Džaferović, Nudžejma Hubanić, Esma Junuzović,
Nađa Osmanagić, Mirza Bakal, Hana Salom, Ema Selimović, Tajra Osmanagić, Amila Gabela, Meliha Kasapović,
Arnela Obralija, Zerina Osmić, Abela Rastoder, Amina Huko, Ajdin Polić, Ivan Bošković, Anela Coković, Tea Dedić,
Alisa Bjelonja, Nura Džanko, Amra Koldžić, Ema Čatić, Zerina Omerbašić i Helena Bogdanović

LEKTURA I KOMPJUTERSKA OBRADA

Dženana Nezirević i Senada Turajlić

GRAFIČKI DIZAJN I DTP

Fadil Pleho

ŠTAMPA

Tipografija d.o.o. Sarajevo

Tel.: 033/238-489

E-mail: tipografija.sarajevo@gmail.com



ADRESA REDAKCIJE

Treća gimnazija, Vilsonovo šetalište 16, Sarajevo

Tel./Fax: 033/724-500

E-mail: info@treca-gimnazija.edu.ba

Web: www.treca-gimnazija.edu.ba



Sarajevo, januar 2019.

